

ASO FARAILE, 19 IUNI 2020

Na nofoia e le Fofoga Fetalai le Nofoa i le itula e 9:14 i le taeao.

Tatalo.

FOFOGA FETALAI: Ou te faasilasila atu ua toe amataliaina Galuega ma Taulumaga a le Fono Aoaofaitulafono.

ISI FAASILASILAGA A LE FOFOGA FETALAI

**TEUTEUGA O LE POLOAIGA MO FAALAVELAVE TUTUPU
FAAFUASEI**

E faasilasila atu ma le agaga faaaloalo i le mamalu o le Palemene ua ou taulimaina nei Teuteuga o le Poloaiaga mo Faalavelave Tutupu Faafuasei **Numera 18 mo le Koviti-19** e pei ona amata faamamaluina i le Aso Tofi, 18 Iuni 2020.

O lenei Teuteuga ua soloia ai le Poloaiaga o Faalavelave Tutupu Faafuasei Numera 17 o le Aso 16 Iuni 2020, ma ou te valaau atu i le Susuga i le Failautusi na te tolauluina Teuteuga e 4 o lo o tuuina mai.

Ou te tapa lau Susuga i le Failautusi.

Na tolauluina e le Failautusi le Teuteuga o le Poloaiaga mo Faalavelave Tutupu Faafuasei.

Teuteuga o Poloaiaga mo le COVID-19 e pei ona auiliili atu i lalo:

1. Faigamalaga i le Va o Samoa ma Amerika Samoa

Le toe amatalia o faigamalaga i le va o Samoa ma Amerika Samoa i le Aso Tofi 18 Iuni 2020.

O nei faigamalaga o le a faaoga ai le Samoa Airways ma le Talofa Airways e malaga ese atu ai tagatanuu o Amerika Samoa

o loo i Samoa nei ma auina mai tagata Samoa o loo poloka i Amerika Samoa, ma e faavae i aiaiga ua taua i lalo:

- i. Mo tagatanuu Samoa o loo fia fo'i mai, e tataua ona silia i le 14 aso talu ona aumau i Amerika Samoa;
- ii. E lē faanofoesea i latou nei pe a taunuu mai i Samoa, ma o le a aga'i sa'o i o latou aiga;
- iii. Le feutaga'i ma le Malo o Amerika Samoa, mo le malaga atu o vaa alalo mo feoaiga ma fefaatauaiga masani, e taulamua ai le Matagaluega o le Va-i-Fafo ma Fefaatauaiga;
- iv. Le faamutaina o nei suiga pe afai e tatalaina tuaoi o Amerika Samoa i malaga mai Hawaii.

2. Femalagaiga i le va o Niu Sila ma Samoa

Le faatulagaina o polokalame o vaalele mo le toe aumaia o tagatanuu o Samoa o loo i Niu Sila faapea ma i latou sa galulue i galuega faavaitaimi e faavae i aiaiga ua taua i lalo:

- i. Le faaaogaina o vaalele tetele o le Ea Niu Sila ina ia toatele ni pasese e malaga mai ai;
- ii. Mo le malaga o le Aso 26 Iuni 2020, ia faaoga se vaalele telē e mafai ona aumai ai pasese e o'o atu i le 300;
- iii. Le faatalanoaina o le tulaga o le mafai ona faia ni malaga togipau a vaalele (chartered flights) mo i latou o galulue faavaitaimi (RSE workers), ae ia faamautu tulaga i le faatupeina;
- iv. Ia faaaauu pea ona faia COVID tests i le tolu (3) aso a o le'i tuua Niu Sila, faatasi ai ma le medical clearance, ma e totogi lava e le pasese le tau o le faatinoina o le tui (NZD\$250.00);
- v. Talu ai ona o le tulaga utiuti o tui o loo iai nei, ia faamalosi le faia o tui mo nā o ē ua alia'e ai āuga o le faama'i (symptomatic);
- vi. Ia taga'i i le toe faatinoina o aiaiga mo le tuuina atu o suesuega (swaps) i Niu Sila e faamaonia mai ai, e pei ona mua'i faatinoina ai.

3. Uunaia le faia o Talifofoga (Facial Masks)

- i. Le uunaia o le faia o tali fofoga (facial masks) e tagata uma;

- ii. Le uunaia o le faatinoina o le tumama lautele e pei o le fufuluina o lima i soo se taimi;

4. Aso Fanau, Saofa'i ma Umusaga

- i. Le tatala o le numera o i latou e auai i Saofa'i, Umusaga ma Aso Fanau i le 50 paga (50 couples).

Ua soloia le Poloaiiga o Faalavelave Faafusasei Numera 17 o le aso 10 Iuni 2020.

E faatumauiina pea isi aiaiga o Poloaiiga o Faalavelave Faafuase'i na mua'i tuuina atu.

O lenei Poloaiiga e amata faamamaluina i le Aso 18 Iuni 2020.

Sainia i le aso 17 Iuni o Iuni 2020.

Tuimalealiifano Va'aletoa Sualauvi II O LE AO O LE MALO

FOFOGA FETALAI: Ou te tapa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, pe a faafogafoga i le tolauluina mai o le poloaiiga, ua taoto nei i lumamea, ou te manatu e fia fai atu sina au faaopoopoga.

Ae ou te le i faia se upu e faatalofa atu i lenei taeao fou i le paia mauuluga o sui usufono o le Fono Aoao Faitulafono, afio o lau Afioga faapea sui usufono mamalu. Faafogafoga mai foi lo tatou atunuu i lenei taeao fou e faafetaia ai le aloga ma le agalelei o lo tatou Matai Sili ua taitaiina mai lo outou soifua ma lo matou ola e faaauau le galuega o lo o fitaituga i ai le mamalu o sui usufono o lenei Fono Aoao Faitulafono. O lea ua faafogafoga i le tolauluina mai o le Poloaiiga, ma o lo o i ai le vaega o lo o taua ai ia feutanaiga ma le Malo o Amerika Samoa i le ono tatalaina ai o femalagaaiga o vaa a lalo, mo le faatinoina o fefaatauaiga i le va o atunuu e lua.

O lea ou te fiafia e faasilasila atu aloaia ua uma ona ma fesootai i fesootaiga masani ma ua logoina mai ai au nei ua tafa lona finagalo i le tulaga o fefaatauaiga, o le toe tatalaina o fefaatauaiga o femalagaaiga i vaa a lalo, ae

i ai aiaiga e tatau ona faatino ma o le tulaga lena i se taimi ona faaauau lea i aiaiga o le tatalaina o fefaatauaiga i va o atunuu e lua ona e le taumatea e pei foi ona tatalaina ai pea tatou foi fefaatauaiga i le va ma atunuu i fafo o lo o auala mai ai pea oloa mo le fofoga taumafa o le tatou atunuu. O lea ua ou fiafia ai e faasilasila atu lea foi tulaga faafiafia loto i le tatou aufaifaatoaga o lo o faatinoina lea galuega tele o le totoina o le laueleele i mea toto ma tapena foi mo latou fua o faaeleeleaga e lauina atu i fafo.

E le gata i lea a o ni oloa foi e fia moomia e tatou mai o tatou uso i Amerika Samoa, o le agaga faafetai lea i le faatofalaiga fetalai i le Afioga i le Alii Kovana i Amerika Samoa e momoli ai le faafetai, e le taumatea o lo o faafogafoga mai foi i faasalalaga o tualumaga o le tatou Fonotaga lenei.

Lau Afioga i le Fofoga Fetalai, ia o le toe faaopoopo atu lea e tusa ai o le Poloaiga ua faafogafoga i ai le tatou Maota i lenei taeao.

FOFOGA FETALAI: Malo faafetai, ua manino le faafogafoga tapuai mai a Samoa i le faamalamalaga a lau Afioga i le isi faaopoopoga e tusa ai o le Teuteuga ua i ai le Poloaiga mo Faalavelave Tutupu Faafuasei. Malo faafetai.

Ia, e faamoemoe i le Atua ina ia mafai ona faataunuu i le manuia fuafuaga aua o le tagata lava e fuafua, tapena ma saili ae faalagolago i le agalelei o le Atua e faataunuina ai. Malo faafetai.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 & TULAFONO TAU FAAOFI O LE
FAATATAUINA O TUPE 2020/2021 – felafolafoaiga faaauau i luga o
le faitauga faalua**

FOFOGA FETALAI: O le a faaauauina felafolafoaiga i le Tulafono Tau Faaofi pei ona taua. Ma e tolopo Galuega a le Fono Aoao i le po anapo o lo o ua maea ona saunoa le Sui Taitaifono o le Komiti o Tupe Maua ma Tupe Totogi. Ma lou faaaloalo ou te tapa lau Afioga i le Taitaifono o le Komiti o Tupe Maua ma Tupe Totogi mo lau saunoaga.

Tulai mai lau Afioga i le sui usufono mo Alataua Sisifo, lau Afioga i le Taitaifono.

Afioga ALIIMALEMANU ALOFA TUUAU (Alataua Sisifo, Taitaifono o le Komiti o Tupe Maua ma Tupe Totogi): Ia, ou te tulai atu ma le agaga faaaloalo e faatalofa atu i lenei taeao fou i le maleifua mai ma le alafai mai i faguga lelei o le paia o le tatou Maota nei, aemaise foi o le faafogafoga tapuai mai a lo tatou atunuu i ona tulaga faalupe.

Ae le i faia se tala ou te tamalamala lava se upu i le taeao lenei, ona o Samoa o le vaa faaofigata, o lea ua afifio le paia maualuga o le Palemene, lau Afioga

i le Palemia ma le Kapeneta, afifio foi Minisita Lagolago, faapea Taitaifono ma Sui Taitaifono ma le mamalu o le Palemene, ae le gata foi i lea o Ofisa Sili o Pulega o Faalapotopotoga ma Matagaluega uma a le Malo faapea auunaga eseese.

Faafetai i le avanoa se i taumafai atu ai lava se sao o le itumalo o Alataua Sisifo i Tala Faatatau o Tupe ma tuuina atu se aotelega o le Lipoti a le Komiti Tupe ma tali i nisi o fesili na tuuina mai e uiga i le Tala Faatatau o le Tupe 2020/2021 ma le Tala Faaopoopo o Tupe (Nu.3) 2019/2020. I le aotelega o le Tala Faatatau Autu o le Tupe 2020/2021, o tupe maua mai lava i totonu o le tatou atunuu mai lafoga ma tiute ma tatou tupe masani ona ao, e \$588,654,287. E muamua lava la ona aveese le totogiina o tatou aitalafu. E \$89,328,161, vaegatupe e faaaluina i le totogiina o aitalafu faapea ma nisi o tupe alu faaetulafono e \$51,651,457. Ona maua ai lea o le aofaiga o tupe alu faaetulafono e \$137,428,197 e muamua lava toese mai i a tatou tupe maua, ae le i faagasolo nisi fuafuaga. A uma la ona aveese a tatou vaegatupe nei o aitalafu ma tupe alu faaetulafono, ona totoe ai lea o le \$451,226,090. O a tatou tupe faameaalofa mai paaga e \$249,575,571 ona maua ai lea o le \$700,801,661. O tupe maua mai faaunegatupe mama le tului e \$11,423,792. O le aofaiga o a tatou tupe faaalu i polokalame e le o aafia ai tupe ia ua aveese mo a tatou loans ma vaega faaetulafono e \$828,412,612.

A toese mai la mai a tatou tupe ia na totoe ona maua ai lea o le faasiliga o tupe faaalu nai lo tupe maua po o tupe pau, po o le deficit e \$116,187,159 mo le faatinoina o a tatou galuega i le tausaga 2020/2021. Ae i ai ma isi vaegatupe e faatino sao mai e a tatou paaga lea e faapea o in kind contributions, e ala ona le aafia i le Tala o le Tupe aua e leai ni tupe o aafia ai o la e totogi sao mai lava e a tatou paaga galuega ia, e \$135,542,173. O ia galuega lea e aafia ai le toe fausiaina o le auala laupapa i Vaisigano, o poloketi mo le toe faaleleia o auala, o polokalame sikolasipi lea e \$27 miliona le tau, o le fausiaina o le uafu faapea foi le faatauina o le vaa fou lea i le va o Salelologa ma Mulifanua. O nisi na o a tatou galuega o lo o faatupeina sao mai e a tatou paaga po o in kind contributions. O le faasiliga la o tupe alu nai lo tupe maua lea e \$116,187,159, i se tala faatatau o tupe, lea e taua o tupe pau po o le deficit, na ona ou faamanatu lava o itu lelei i le mea e ala ai ona fai ituaiga tala faatatau o tupe ia e i ai tupe pau. O le...

FOFOGA FETALAI: Malie le Taitaifono se i tulai mai le Minisita o Galuega Tetele.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Lau Afioga i le Fofoga Fetalai, e le fia faalavelaveina le saunoaga matagofie a le Taitaifono, na o se mea e fia faasao. O le vaa lea e talanoa mai ai le Taitaifono, e le o le vaa mo Salelologa ma Mulifanua, o le vaa foi lea o le Lady Naomi lea e alu i Amerika Samoa

lea e maua mai ai le fesoasoani a Iapani. A o le vaa lea e talanoa mai ai mo Salafai, e le i faamautuina le tulaga lea. Ma lou faaaloalo lava.

FOFOGA FETALAI: Ia tulai mai le Taitaifono.

Afioga ALIIMALEMANU ALOFA TUUAU: Faafetai mo le faasaoga i totonu o le Lipoti ona o le faatauina o le vaa lea, e leai la e le o le vaa mo tatou Savaii, o le vaa mo Tutuila ma iinei i Apia. Ona toe foi mai lea o le tala i le mea e manaia ai le mea lea o le i ai o le tupe pau pe sili atu tupe faalu nai lo tupe maua. Muamua, e uunaia malosi ai le aufaigaluega e ao mai tupe e tatau ona maua i totonu o le tatou atunuu.

O lona lua, o le tele o tupe faaalu, aemaise lava mea o atinae, e siitia ai le tamaoaiga. O lona tolu, e fuafuatatau ai foi tupe e faaoga, ae agai tonu lava, focus i le atinaeina o le atunuu. Ma lona fa, e toe tomanatu ai le aufaigaluega a o le i faaluina tupe, pe manaomia le faaalu o tupe pe toe fetuunai a tatou resources. O le masani la a atunuu i le tapenaina o tala faatatau o tupe pe a sili atu tupe faaalu nai lo tupe maua, o le sii lea o lafoga, lea sa ou faalogo atu o taua mai e se tasi o sui usufono faapea e tatau ona sii le VAGST e faapaleni ai le tala o tupe, peitai e leai se tulaga faapena o tupu mai. Na ona ou toe faatepa lava o le Palemene i tala faatatau o tupe i le 5 tausaga ua tuanai se meamanu lea e le i uma atu le tatou Paeaiga.

I le 2015/2016 o le Tala o le Tupe Faatatauina na fuafua, e \$11,308,235 le tupe pau. Peitai ina ua uma le tausaga, ina ua aumai le faamatalaga o tupe ua uma foi ona sueina e le suetusi, e \$28,902,626 tupe faasili po o tupe mama.

O le 2016/2017, e \$84.3 miliona le tupe sa faatatauina ina ua uma ona oo mai faamatalaga o tupe e \$63,849,496 tupe faasili sa i ai. O le 2017/2018, e \$2,142,895 tupe pau sa fuafua i ai mo lona tausaga. O le faaiuga o le tausaga aumai tala o le tupe ua uma ona sueina e suetusi, e \$30,978,148 le tupe mama.

I le 2018/2019, o tupe pau na fuafua mo lona tala faatatau o tupe, e \$12,871,317 ina ua aumai le faamatalaga o tupe ua uma foi ona sueina e suetusi, e \$47,639,967 tupe mama. O le tausaga lena o le a faauma, e \$72 miliona le tupe pau. E faapena foi i le tausaga fou e \$116,187,159 tupe pau.

O aga lava ia o le tapenaina o tala o tupe a so o se atunuu, e ui lava ina e faamata e foliga mai pe a tapena e pau tupe ailoga a gafatia, ae uma ae lava le tausaga aua o i ina lea e galue agai i ai le aufaigaluega, e totoe lava tupe. E le o po malae i le tulaga o aafiaga ogaoga ona o le tulaga o lo o i ai le tamaoaiga o le lalolagi lea e aafia ai ma si o tatou atunuu ona o le faamai o le Koviti-19. I le taiala la mo atinae o Samoa 2020/2021, agai atu i le 2024 i le 2025, ua faamautuina ai le sini mo le puipuiga o le auivi o le tamaoaiga, ina ia mautinoa ai le faaitiitaiina o aafiaga i le tamaoaiga, ma ua i ai nai fetuunaiga laiti i faiga faavae tau tupe a le Malo i vaega e 5 nai lo le 6 o vaega sa i ai talu ai.

Muamua faiga faavae ia tau tupe a le Malo ia faatumauina i totonu o le 2% o le tamaoaiga le faasiliga o tupe faaalu nai lo tupe maua. I le \$116 miliona la o tatou tupe pau lea e fuafua mo le 2020/2021, pe a faatusatusa i le tatou tamaoaiga e \$2.37 piliona, na o le .5%. O lea tatou te i totonu lava o le 2% o le tamaoaiga.

O le faiga faavae lona lua, ia i le va o le 25 i le 30% o le tamaoaiga le aofai o tupe faaalu masani mo galuega faatino. O galuega faatino lava ia e \$612 miliona pe a tuu i le faatusatusa i le tamaoaiga o le tatou atunuu o lo o i ai nei, na o le 26% le aofai o tupe faaalu masani ia mo a tatou galuega faatino.

O lona tolu o faiga faavae a le Malo mo tulaga tau tupe, ia i le va o le 35% i le 40% le aofaiga o tupe faaagaaga mo totogi o le aufaigaluega. O totogi lava ia o le aufaigaluega mo le tausaga fou e \$279,886,129 e faaalu ai, o le 33% lena o a tatou tupe faaalu.

Lona fa, ia faatumauina i lalo ifo o le 50% o le tamaoaiga le aofai o nonogatupe a le Malo. Faaiuga o Tesema 2019 e \$1,000,028,000 a tatou aitalafu. E \$47.1 miliona o le tatou tamaoaiga. E pei ona taua e se isi o sui usufono anapo, o la e tele le avanoa mo nisi nonogatupe.

O lona lima, ia faatumauina i lalo ifo o le 20% o tupe maua le aofai o tupe totogi mo nonogatupe, a tatou tupe maua ia e le aofia ai tupe faameaalofa ia e aumai a tatou paaga. O le \$588 miliona lava ia o a tatou tupe maua, lea na ou taua muamua lava tupe e alu i a tatou aitalafu, e \$89,328,161. O lona uiga, na o le 15% lea e faaaluina e totogi ai a tatou aitalafu. O faiga faavae na e fua i ai le iloiloga a le Komiti o Tupe, pe na mulimulitaia ma usitaia i le tapenaina o le Tala o le Tupe.

I le tala fo le tupe faaopoopo lona tolu, tupe maua faaopoopo, e \$3,741,430 na maua mai ia tupe maua faaopoopo mai tupe ia sa maua mai le alofa o a tatou paaga ma nai o tatou lava tagata i le misela, e \$2.6 miliona ia ma lafoga o penisini ma suauu e \$1.3 miliona, ona aveese ai lea o vaegatupe faaalu faaopoopo e \$6.905...

FOFOGA FETALAI: Malie le Taitaifono o le Komiti se i tulai mai le sui usufono mo Salega.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, na o si vaega lava lea e fia avatu ai se faamalamalamaga. Faafetai atu i le Taitaifono o le Komiti o Tupe i le latou galuega maeaea ma sa fitaituga ai foi, e le faigofie foi lenei vaega tele o le galuega. Na o lou faafesili atu lava ona o lea ua tolaulau mai le tulaga o aitalafu ma mea faapena. O lea e maua atu faapea o lo o sololelei lava le tulaga o aitalafu i lalo o le 50% o le GDP. O lau fesili atu i lau Afioga i le Taitaifono ona o le fegasoloaiga o informations o faamatalaga ia tau tupe ona o lau vaai i ai i le galuega a le Matagaluega o Tupe i le latou lipoti lea ia Aperila lea ua tasi le masina talu ai, e ese faamatalaga o lo o aumaia i totonu o le Palemene, ese faamatalaga

o lo o latou fesootai ai ma le IMF. O lau fesili la lena, aua a ou tilotilo atu ua ova mamao ma le 50% o le GDP ia tatou aitalafu i faamatalaga ia e avatu i o i le IMF. A o i la, e malie foi la le saunoaga a le Taitaifono i le isi vaitau, pei na o ni mafaufauga ia e faaali mai i i. A o lau faalogologo atu i le Taitaifono, e pei o ni mea moni lava ia e talatalanoa mai ai ma le latou Komiti.

O lona lua lau Afioga i le Fofoga Fetalai, o lea ou te tau mafaufau atu o lea e agai lava le saunoaga a le Taitaifono i mea ia o deficit. Ae i si ou lava tamai malamalama i le faiga o lata ita sefe panikeke i le matou fale, a oo loa ina uma ua audit mea o accounts, ua le toe taua o ni deficit, a ua tau foi lele o le mea o le profit po o le loss le mea lea. Ae pei o lea e agai lava le saunoaga a le Taitaifono i le tulaga lena. Ma le faaaloalo.

FOFOGA FETALAI: Ua maua atu. Faafetai. Tulai mai le Afioga i le Taitaifono.

Afioga ALIIMALEMANU ALOFA TUUAU: Ia, o le a taumafai e tali atu, ua faalavelave tele o lea ua ala le mafua.

O le tulaga i le Lipoti lea a le Matagaluega o tupe, leaga e le i oo mai i le Palemene. O lea e talanoa atu le Komiti Tupe i lipoti ua uma ona sueina ai tusi, ua i ai le opinion a le suetusi. Ae afai o se lipoti nei ia Aperila, ia se i oo mai la le lipoti lena, e le i i ai se lipoti faapea ua tuuina mai i le Komiti o Tupe. Ia, ua taua le mea lea o le profit ma le loss. Ua masani matou Accountants i mea ia, a ova ia tupe faaalu na i lo tupe maua ona tau lea o le deficit, ae a gau, ona tau lea o le bankrupt. Aua o le mea lena o lea e, ua gau a foi lele, e le iloa pe toe tu i luga pe leai. A o le deficit, e na ona pau lava toe tu i luga. Aua foi o la e i ai auala e toe taumafai ai ia faalelei. A o le fesili la a le sui usufono, o tulaga e ese mea o le vaaiga o tusi a pisinisi, ese le mea o le vaaiga o tusi a mea nei o Malo, o atunuu. Aua foi o tupe e totoe, e toe faaauau ai atinae o le isi tausaga, tupe mama, lea e tau o tupe mama po o tupe totoe po o le profit. O le tele lava la o tupe ia i le matou matau, o tupe lava ua uma ona faaagaga mo le faaauauina o poloketi. Se meamanu lava o lea e afifio mai le toatele o Ofisa Sili o Pulega o Matagaluega, o le isi lea vaega e fia oo atu i ai se tala, ae se i uma i le tatou delivery, a o le faamalamalama lena. E le o ni tupe foi lele e pei o lau pisinisi e uma e pule ai lava lea o oe po o le a le isi au mea e toe fai i ai. A o tupe ia, o tupe ua uma ona faamaoti, ua i ai commitments e toe faaauau ai isi atinae.

Lau Afioga i le Fofoga Fetalai, o le... o lea la ua le iloa le mea...

FOFOGA FETALAI: Se i tulai mai le Palemia lau Afioga i le Taitaifono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: A o tau faamaopoopo ane

pepa a le Taitaifono e pei e sili ona ou fesoasoani atu foi au i le galuega tele a le Taitaifono. E faamalo foi i le Taitaifono i le tau faamalamalamaina o lenei mataupu aemaise lava o le faataua mai e le Taitaifono o le mea o le in kind, e le o ni tupe, ae a oo mai le vaa ma o le tau o le vaa e \$60 miliona, ua na o se tala faatusa. Afai o le tau o le vaa la e fau e Iapani e \$60 miliona, e tuu le latou tau tau atoa lena, e tuu i lalo o le foai, e atagia i totonu o le paketi, ae leai se tupe e aumai e aumai le vaa. Sa ou faalogologo i le leitio o fesili le isi tagata, o le a ea lenei mea e igoa o le in kind? Ia o le tali lena, tatou te le vaai i ni tupe ae tatou te vaai i foliga o le fesoasoani lea e aumai. O le ala la lena e tau lava i lalo o le grant, o le meaalofa.

O le taua o le itu lea lau Afioga i le Fofoga Fetalai, leaga o anapo sa tolaulau ai vaegatupe ua le faaaogaina. O lona uiga ua ova, e le i faaaogaina, o in kind la isi mea ia, e le i aumaia. Ona e i ai faalavelave ua tutupu, e pei la o lenei, talu ai le Koviti, e 3 lelei poloketi a Saina ua tolo, e i ai le faleaoga, e i ai le isi mea e i ai ma le faiga o le kolisi lea i uta, le kolisi a leoleo. Ia o lea la ua tolo. Pe oo atu foi la i le tausaga nei pe a amata, o le a le vaega tupe ua faaalu, e faaalu sao lava e Saina latou i le aumai o materials e fau ai le kolisi lea. Ona faapena lea ona atagia i lalo i i, e i ai le tupe faasao. O le manatu la lea faapea o se mea e tau faapaleni, e leai ni mea e tau faapaleni. Aua foi o lea e tauave vaegatupe ia, o lea e faaauau pea le atinae e pei foi ona ou tau faamatalaina atu. E 2 i le 3 tausaga, o fai pea le tatou malaevaalele, ae ua uma ona saina feagaiga ma faasolosolo sao mai lava e latou seleni e faatino ai. O le mea la lena, e leai lava se mea e popole ai le atunuu i le faalogologo mai, e i ai tupe faasao, ai o faaoga e le HRPP e fai ai a latou campaign, ai o tufa. E le mafai ona faia le mea lena. O la e sau sao lava e tuusao mai lava e latou e auala i le faatinoina o le mea lenei, o le taua lena o le faasilasilaga lea na aumai e le Taitaifono e faamanino atili ai le vaega lea pe a i ai ni tupe faasao ua le faaaluina lau Afioga. E faaauau pea le poloketi, ma faaauau pea i tausaga e sosoo ai, e pei lava foi o pisinisi a i ai ni polofiti e faaauau i tausaga e sosoo ai. E pau le mea e eseese ai le polofiti ma le Malo, o si au lava pisinisi, o si au lava pisinisi e pule ai lava oe. A e pule lava e soona faaalu e pule ai lava oe, e leai se isi e fesiligia. A o i la i le Malo e tele e e fesiligia mea ia, ae ia fesiligia a ia malamalama. Ae le o le tu sasae ae lava i luga, fai mai ua a ma a ma a.

Ae o le taua lena o le faamaninoga lea ua aumai, ma o lea ua faataoto mai, e i ai tuaoi e faataatia, e oo loa i ai, amata loa ona emoemo mai le moli, alert mai le Malo, e auala mai i le latou fautuaga e tuu mai e le Minisita o Tupe ia matou. O le mea la lea e le tataua ona tatou faia. E masani tele ai Laauli lena e nofo mai i le taimi foi sa matou i ai i le Kapeneta, e tapa lava le fautuaga mai le Ofisa o le Tupe. O le a le tulaga o le tupe o ai? Ona fuafua faatatau foi lea i ai o faaiuga a le Kapeneta.

Lau Afioga i le Fofoga Fetalai, o lou tulai atu lena, e fesoasoani i le tulaga lea sa fesili ai le sui usufono, ae o lea e matua manaia lava le faataotoga mai

e le Taitaifono, e i ai le tuaoi e le mafai ona tatou oo i ai, e aofia ai la mea ia o tupe e toe totogi, o aitalafu mai lea tausaga i lea tausaga, atoa ai ma le maualuga e ono oo i ai tatou. Ae o le mea lea o le deficit i le tausaga lenei, o lea e fuafua, o lena ua saunoa le Taitaifono, o le isi vaega e \$107 miliona o mea o foai. E auala tuusao mai, e tele lava o le faatinoga o le paketi, e auala tuusao mai in kind. E auala mai mea o lea e faatino e latou ma aumai le isi vaega tele o le latou foai lena. Ae le o le tu sasae ane lava ma faapea ane, ua matua leaga tele lea mea. O lona uiga a tuusao loa le fautuaga, o lona uiga o lea ua fai mai le sui usufono mo Salega Sasae, e teena uma ia fesoasoani ia e aumai ia aua le talia, leaga o le a tefisite ai le tatou paketi. A o lea ua faafogafoga mai, manaia tele le saunoaga faamalamalama a le tatou Taitaifono, ma o iinei i le Maota lenei na tu ae le isi taitai ma faapea mai, “O a upu a Paulo? O le alofa, o le alofa e lavatia ai mea uma. O le alofa e onosai, o le alofa e le tu soo i luga e fesili.” Ia o le fesoasoani atu lena.

Tofa Olo Fiti Afoa Vaai: Lau Afioga i le Fofoga Fetalai, se faamolemole lava, ou te malamalama lelei lava i le mea e tau o le in kind. Ae ala ona mafua lau Afioga ona ou fai atu, ona o lea e...

FOFOGA FETALAI: Ou te le i avatua se avanoa, o le mea lena o lea e fai ma le maua atoatoa ai a lua saunoaga, ona lua tuuaia loa lea o le auaunaga a le Ofisa o le Fono, leaga o le isi taimi e te lua tulai mai i le tulaga foi lea ita, le onosai, ae le oomia le mea mumu lena e i luma. Ona e saunoa lea le uma na... ua le mafai ona pue lau saunoaga, aua e le o oomia le mea mumu lena. Ma le isi mea, e mafiti i luga le mea mumu lena pe a ou faatagaina oulua e te lua tutu mai. O le mea la lea, se i tulai mai le sui usufono.

Tofa Olo Fiti Afoa Vaai: Lau Afioga i le Fofoga Fetalai, malie lou finagalo, leai o au ou te malamalama lelei lava i le mea lea e tau o le in kind. Ae na mafua ona ou laga le mataupu lea, ona o le Lipoti a le Komiti o Tupe. A silasila lau Afioga i le latou lipoti i le \$20 miliona lea e aumai faa-in kind, ua oo mai le fesoasoani a le JICA, manaia ia o le faamatalaga, ua ofo fua mai, ae oo mai i le fesoasoani a... oi a Iapani, ae oo mai i le isi mea lea, o le tupe e faatau ai le vaa, lea sa tulai ai le Minisita mo Galuega. O le mea lena ua ou confuse ai, po o le mea e ofo fua pe o le mea e faatau mai, matua confusion atoa le mea lea...

FOFOGA FETALAI: Se i tulai mai le Minisita o Tupe. Ae a pe a malie lau Afioga i le Minisita se i faamotu mai ma le isi sui usufono lea e tulai mai ona e saunoa lea.

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, e leai lava se agaga lau Afioga i le Taitaifono....

FOFOGA FETALAI: Ia, o lo o finagalo le Minisita o Tupe, se i faasao muamua le mea lea e tulai mai ai le sui usufono mo Salega, ae se i tulai mai le...

Afioga Hon Sili Epa Tuioti (Minisita o Tupe): Faafetai lava i lau Afioga i le Fofoga Fetalai, na o se fesoasoani e faamalamalama atili le tulaga lea o le in kind. E pei foi ona saunoa le Afioga i le Palemia, o le meaalofo lea e aumai e Iapani, e fai e latou le vaa, o le latou fesoasoani, mo grants. E le se tatou aitalafu, e le aumaia le tupe, ae fau lava e latou le vaa ona momoli mai lea.

O le isi tulaga faapea i aitalafu ma le GDP, e lata mai nei ina ua tatou afaina foi i le misela faapea ai foi ma le Corona Virus, sa fai ai projections a le IMF. O le vaaiga a le IMF, a fai a tatou aitalafu, o lona uiga e oo i le 70% o le tatou GDP, o le a afaina ai. Ona o le latou malamalamaga o le a tatou o e sue mai ni loans mai le World Bank, po o le ADB po o ai lava, ina ia faapea ona fesoasoani ai i le faatupeina o a tatou atinae faapea foi le fesoasoani i le stimulus package, le faamama avega i lo tatou atunuu. Ae peitai, e le o talia e le Ofisa o Tupe ma le Malo, ona o le tulaga e le o i ai se manaoga i lenei taimi e toe fai ni nonogatupe fou. O le taimi lenei o lo o ua faagata lava i lalo o le 48%, o le naunauga foi lena o le Malo ina ia faapena ona tumau lava, ia aua ne i toe oo i le tulaga o le 60 po o le 70%. A o le taimi lenei i le tatou aitalafu e fuafua i le GDP e na o le 48%.

Sa talosaga mai foi le World Bank ma isi, pe manao Samoa e toe tolo atu i tua le totogiina o tului ma aitalafu ia mo ni nai po o le 12 masina. Ae o le matou lava talanoaga i totonu o le Ofisa o Tupe, e leai se mafuaaga tataua e ala ai ona matou talia le talosaga a le IMF, ona o le matou manatu, o lo o lava ma totoe a tatou tupe o lo o i ai nei, aemaise foi tupe ia e aumai in kind, ma le tele o le alofa mai foi o Faalapotopotoga ma Malo lea na aumaia tupe, mo grants, e faatupe ai a tatou polokalame i le taimi lenei. Ae ogatasi lava foi ma le fautuaga a le Lipoti a le Komiti o Tupe.

FOFOGA FETALAI: Malo. Se i toe tapa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E faaopoopo atu i le saunoaga a le Minisita, ia manatua e le Maota lenei, talu mai le tausaga e 1983 ua amata auina atu ai o tatou tagata officials i totonu o Matagaluega, aemaise lava le Matagaluega o Tupe e galulue i totonu o le IMF, e galulue i totonu o le Faletupe o le Lalolagi, galulue i totonu o le Faletupe o Asia i official o le pulega. E latou te silasila totoa i metotia e faatulaga ai tamaoiga o le lalolagi. O lea la ua o tatou tama fanau ma toe taliu mai, ua ese la le tulaga lea ua i ai Samoa. A o mai savali nei mai fafo, o nisi o savali na, o lea

e omai ai tagata e le i leva ona i totonu o le Faletupe o le Lalolagi po o le Faletupe o le IMF, faaputugatupe po o le ADB. A o lea ua saofai atu i totonu o tatou Matagaluega i latou ua lava le potu masani sa aoaina training i totonu o metotia i le vaaiga o mea tau tupe i totonu o Faletupe o le Lalolagi ma totonu o faaputugatupe o le lalolagi, e faapea foi ma le Faletupe o Asia. Nei, o lea ua faatu o latou ofisa i totonu o Samoa. A o ai la la e faauluulu i ai o latou ofisa nei? E faauluulu foi i isi tama fanau a Samoa sa galulue ai i totonu o faletupe nei. A o mai la latou e o mai iinei e asi, e o mai faatalatalanoa, ae ua matua malamalama, e brief, e ave faamatalaga e latou sui nei e galulue iinei, o isi foi Samoa ua matua lava le malamalama, ma iloa ai e latou le faagasologa o le faatinoina o galuega a lo tatou Malo. E o mai lava latou fai le latou fautuaga, e faapea ma faapea ma faapea, ona aumai loa lea i totonu, ona tilotilo lea i ai o le Matagaluega o le Tupe, ona fai foi lea o le latou, faatino lea o le latou fonotaga i totonu ma toe tilotilo i mea ia, po o le a le loloto o fautuaga nei. Ona fai ai lea o latou faaiuga, o lona uiga, o latou lipoti ia e fai mai, e na o ni lipoti e faataatia mai, e pei o ni tuualalo, se i silasila i ai le Malo. E pau lava lona o le malosia o lipoti ia, o ni tuualalo e silasila i ai le Malo pe talafeagai. O le lipoti la lona lea na tilotilo i ai Olo. E le o ni faaiuga, manatua o lea ua saofafai atu iinei isi tagata o tatou sa i ai i totonu o pulega, e le o ni tamai ofisa, na o atu saofafai i totonu o directors office, i totonu o faletupe tetele nei a le lalolagi, ma latou tilotilo i ai i faaiuga a sui nei. O tagata nei o tagata Amerika o tagata Niu Sila o tagata mai Peretania, o tagata mai Europa, lea e soalaupule mataupu tetele ia a le lalolagi, ae o lea e saofafai ai i totonu tatou officials o tagata faigaluega i totonu o Faalapotopotoga nei.

Lau Afioga i le Fofoga Fetala'i, o le ala lona, aua e te popole, i tulaga faapea a e tilotilo i lipoti na, a e vaai atu o fuafuaga, vaai i mea ua tutupu o ai la e te talanoa i ai? Talanoa i le Taitaifono o le Komiti o Tupe. Lau Afioga i le Fofoga Fetala'i, o le tulaga lona. O le isi mea, o mea ia o nonogatupe tatou te talanoa ai.

Ina ua avea i tatou ma sui auai ina ua faatuina le Faletupe o Asia i le 1966, na o Samoa le atunuu tutoatasi o atumotu o le Pasefika ua tutoatasi, lea la na avea ai tatou ma sui faavae, na o tatou lava o atumotu o le Pasefika, o sui faavae o le Faletupe o le Atinae o Asia. O le 1971, 1972 avea i tatou ma sui o le International Monetary Fund, ona mulimuli ane ai lea avea ma sui auai. O lona uiga o tatou e fai share i totonu o faalapotopotoga nei. O lona uiga, o tatou e pulea faalapotopotoga nei. So o se malo lava e umia le share o se faalapotopotoga, e pei foi o kamupani ia e iinei, e umia loa e o tatou tagata e tai pei o le vodafone, e umia loa e o tatou tagata ni share i totonu i i, o tagata foi na e pulea faalapotopotoga nei, mo shareholders.

Lau Afioga i le Fofoga Fetala'i, o le mea lea o lea e confuse atoa ai le mea. O le tilotilo i le totality o mea o nonogatupe, o le tilotilo i le vaega atoa o le nonogatupe ae amata mai i le taimi lona ona tatou agai na o nonogatupe lava

mai faapotopotoga nei o le ADB ma le IDA International Development Association o le soft window lena o le World Bank e tatou te nono mai. Aisea? Aua foi na faatu faapitoa lava faletupe nei mo atunuu e vaivai lo latou tamaoaiga. E oo i le 30 tausaga le umi e togitogi ai nonogatupe, e i lalo ifo o le pasene le tului e totogi. E te le maua lava i se isi faletupe commercial bank i le lalolagi ia faletupe nei.

O le tausaga 1991, na sau ai le savali, mission, ona omai lea o le mission lea a le IMF fai mai ia te au, “Tuilaepa devalue le currency a Samoa by 25%.” Ou fesili, “Aisea?” O le masina o Setema na omai ai, ou fai atu lea “Aisea, aisea le mea o le a faapau ai le aoga o le tupe?” Ua e vaai i le mea lea ua agai i ai, o lea ua agai i lalo le foreign reserve o le tatou tupe lea e faaagaaga mo fefaatauaiga, ua agai i lalo, ma ua oo i le tulaga ua lamatia ai le Malo, manatua o le mea tonu lava lea na tifato ai i lalo ma bankrupt ai le Faigamalo a Samoa ae le i, ona tulai mai loa lea o le HRPP take over, faatulaga ai loa taiala tetele, lea la e fai ma suisui, lea e saunoa manino mai ai le tamaitai Taitaifono o le Komiti o Tupe. Ona fai mai loa lea ia te au, tuu i lalo le, o le latou fautuaga, ona ou fai atu loa lea, taatia mai, ona o loa lea. Matou feiloai ou fai atu, vaai ia outou manatua le mea lenei, o le isi vaega tele e sau ai le foreign reserve a tatou, e sau mai le tourism ma sau mai le tulaga o tupe a aiga foi ia e lafo mai i o latou aiga i nei i le kerisimasi, ona tuu lea o le foreign exchange o le tupe a le atunuu ae ave i ai le **equivalent**, ave i ai tupe a Samoa. O le mea la lea, e le iloa e papalagi le mea lena a tatou, e le tuua i lalo se, e le devalue ina le tupe. Tusi i ai i o, fai i ai ua uma ona tatou fono, o lau faaiuga o au o le Minisita o Tupe, e le tuua i lalo le tupe, e i ai mea ia latou te le malamalama ai.

O Setema i le tausaga na sosoo ai, ona alu loa lea o le matou savali e tusa foi o fonotaga, ona matou feiloai muamua lea ma le IMF, uma matou feiloai ma le World Bank. O lau upu lenei na ave i ai i le IMF ma le World Bank, sa outou o atu i le tausaga lea na tea nei, e avatu le tou fautuaga e devalue pe tuu i lalo le malosi o le tupe i le 25% e tau fofo ai le mataupu lea ua tulai mai, ua afaina a tatou teugatupe faaagaaga mo fefaatauaiga. O lena e i ina a matou tusi e talia ai, leaga e i ai mea e patino ia matou tou te le malamalama ai, e patino ia matou tu ma a matou agaifanua. Ma o le faalamalamaga lea o lipoti, e le i alu i lalo le tupe mo fefaatauaiga ua matua alu i luga maualuga.

Lau Afioga i le Fofoga Fetalai, e faapena mo feutanaiga. E le omai lava papalagi ma fai mai ia tatou o le mea lea e tataua ona fai. E tatou te tilotilo foi tatou ia tatou tu ma aga masani, ona o i foi e tele lo latou sao i totonu i le atinae o Samoa. O le ala foi lena, o lea e malosi ai le finagalo o le Maota atoa lenei, vagana se toa-1 po o se toa 2, na mafua ai le Tulafono ua soalaupuleina nei, ia faataua tu ma aganuu a Samoa, aisea? Leaga e tele le sao, e le gata o le atinae o le atunuu lenei, a o le puipuiga o le filemu i totonu o afioaga.

Lau Afioga i le Fofoga Fetalai, o le toe fesoasoani atu lena, ina ia silafia ai, e tele le eseese o mea. Afai e 30 tausaga e totogi ai le nonogatupe i le tului e i lalo ifo o le 1%, o le faatumutumuga lea, po o le loloto lea e oo i ai nonogatupe mai faletupe nei, o le mea la lena e eseese ai. E oo ane i le taimi e uma ai ona totogi, ua fanau faafia fanau faafia seleni e maua mai atinae o lo o faatino, ma mafai ai ona tele galuega e fai, tele tupe maua a le atunuu e maua mai ai, ma tatou le soona ola faalagolago ai. O le mea lena o lea e ala ai ona fesoasoani mai atunuu ia Samoa, ona e vaai mai i le faatulagaga ma le faatinoina o ana fuafuga fai, e mamao lava le mea lea e agai i ai.

E oo foi la i le mea ia o deficit, o le mea lena e oo loa ina faaletonu Malo e pei o le mea na oo i ai le lalolagi i le depression o le 1930, o mea ia na fai. E le toe faapalenia ni paketi, matua faaova, lea na fai e Niu Sila. O le a le mea na fai e Niu Sila? Na matua faaova ma faatele le deficit ina ia maua ai galuega e faafaigaluega faamalosi ai tagata e o e toto le laau, toto le paina, e tusa lava pe le i manaomia i lena taimi ae o pea e toto le paina. O le a la le mea lea ua tupu? O lea ua selesele ai nei Niu Sila i le paina lena lea na toto i le 1930. O mea o tupe, e oo loa i taimi o faalavelave ona tilotilo lea o le Malo, faaova ma faaova tele le faaaluina o seleni, ae i ai lava tuaoi e fai ma vaavaai i ai. E le faapea foi o le a faaova faale-mafaufau ona fai. E fai lava ma le faautauta, o le ala lena e taua ai mo faiga faavae. O le ala lena, a o le i pasia se faiga faavae, e tapa muamua lava le fautua a i latou i totonu o le Matagaluega o Tupe i le tulaga e agai i ai. A oo i le Tulafono pe talafeagai, tapa le Ofisa o le Loia Sili. Ma ia silafia e le atunuu lena, e na o le pau lava loia, o lo o tusia i totonu o le Faavae e limataitaiina ai le Malo lena, o le Ofisa o le Loia Sili. Lau Afioga i le Fofoga Fetalai e pau lava na o loia o lo o i totonu o le Faavae e faalogologo i ai le Malo. O le ala foi lena, e toatele ai pea loia i totonu o le Ofisa o le Loia Sili, lea e tusa e toa 50 i latou uma lava e aafia ai ma le vaega lea o le Komisi o le Toefuataina. O laua uma loia nei, o laua uma loia nei e faalagolago i ai le Malo. E le gata i lea, ae ua tai tofu lava le Matagaluega ma le Faalapotopotoga ma loia e galulue ai i totonu ina ia tapa atu le Malo i se Tulafono, po o ai le Matagaluega e faapitoa i ai, e galulue faatasi le loia lena ma loia o lo o i totonu o le Matagaluega o le Loia Sili.

Lau Afioga i le Fofoga Fetalai, o le toe faapupula atu lena e fesoasoani i le galuega tele sa faafeagai ma le Taitaifono ma le Komiti o Tupe o lo o faamalamalama mai, i le tulaga manino ia mataupu e faatatau i le latou foi galuega, ma le matou faapoopo atu mo le tulaga e aafia ai le Malo. Ona o mea ia, e oo loa i mataupu tau faiga faavae, o mataupu na a le Malo. A o le vaavaaiga o lipoti o mataupu na a Komiti. Ae oo loa i faiga faavae, o le mea lena e ala ai ona tu tu soo atu ma tu tu atu Minisita ina ia faamalamalama, leaga o le faatinoga o Tulafono faatinoga o le faaluga o tupe, e afua atu i totonu o faiga faavae, lea e soalaupule e le Kapeneta.

Lau Afioga i le Fofoga Fetalai, ia o le fesoasoani atu lena atili i le mataupu.

FOFOGA FETALAI: Tulai mai le Taitaifono.

Susuga Hon Laauli Polataivao Leuatea: Faamolemole lau Afioga o lea sa ou talosaga atu pe maua se avanoa...

FOFOGA FETALAI: Ia e faamalie atu i lau Afioga i le sui usufono mamalu, ia se i tulai mai lava le Minisita mo Galuega lau Afioga Papalii.

Susuga Hon Papaliitele Niko Lee Hang: Faafetai lava mo le avanoa, ona mo le fia faasaoina o le taimi o le faauilavea a le sui usufono mai Salega, ou te toe fia talanoa i le in kind lea, ona e matau atu e pei o le lolomiina lea o le faamatalaga lea e agai mai ai se faitioga a le sui usufono mamalu. O la na manino lava i le saunoaga a le Taitaifono, o le in kind o meaalofa, o lea e aafia ai le vaa.

O le faamatalaga lea ou te fai o le faatau, ia o le mea lena e faaoga ai le common sense. O lea ua malamalama lelei o le meaalofa. Ae e sese la le mea lea o le toe faatau aua e sese, e le faatau le vaa. O le vaa e faameaalofa mai. E pei o le tulaga lena ua toe laga ai se manatu, ona e pei e le o malamalama Olo i le mea lea, faafetai.

FOFOGA FETALAI: Malo, faafetai. Ia ma ua ou manatu ua manino atoatoa le faapupulaga a le Malo, o lea foi ua manino le saunoaga a le Palemia. E i ai le manatu e aua le tosoa le tatou galuega. O a tatou Tulafono foi Tumau, aua ne i o tatou faia se faafinauga i se mea sa faapena ona lagaia e se isi foi sui usufono ma fai i ai se faafinauga. Ae afai e tatou te o e toa 2 sui usufono e fai se faafinauga i le mea lava e tasi, ona ou manatu lea o le a ou le faatagaina, ona o le manatu e taofiofia ai...

Susuga Hon Laauli Polativao Leuatea: Lau Afioga ma le agaga faaaloalo e ese si au mataupu. E ese ma le mataupu a Olo si au mataupu lea sa taumafai atu.

FOFOGA FETALAI: Se i faapuupuu mai.

Susuga Hon Laauli Polativao Leuatea: Lau Afioga i le Taitaifono, o le atugaluga lea sa ta manatu e aumai sau faamalamalamaga, o le tatou \$588 miliona le tatou tupe lea e estimate tupe maua. O le mea lea e ta te popoe o lea e tatou te i le vaitau o le Koviti, o le miti, pe faamata e maua uma le tupe lea.

FOFOGA FETALAI: E a pe a faapea...

Susuga Hon Laauli Polativao Leuatea: O le agaga lena sa taumafai atu ai, a o le mea lea e tamau i lalo o tatou tupe faaalu, o lea lava e tatou te tumau i tupe faaalu. O le mea lea e taumafai atu, ia faaalu tatau. O le agaga lena o lea e fai atu ai aua o le mea mautinoa e le maua le \$588 miliona lea.

FOFOGA FETALAI: Ia o lea la o le a ou tali atu i le tulaga lea e faamalamalama ai.

Ia se i tulai mai le Taitai o le Malo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Ia, Laauli, sa e i totonu o le Kapeneta, ma e silafia ai processes a le Kapeneta. E alu le faasalalauga a le Matagaluega o Tupe, e aumai fuafuaga a Matagaluega, Aperila e masani na alu ai, aumai uma lava lea ave i totonu i le Matagaluega o le Tupe, ona faatalanoa loa lea o latou. O le a le... fea e sau ai le mea lea? Fea e sau ai le mea lea? Fea le sau ai le mea lea? O lea lo outou iloa? E ono maua mea ia?

O lona uiga, e leai lava se mea e le i oo i ai suesuega a le Matagaluega a le Tupe ma le Minisita. A uma loa ona suesue, ona toe aumai loa lea i totonu o le Kapeneta, ona toe omai uma foi lea o Faauluuluga o le Kapeneta. O le faalua ai lena, faatalanoa, faatalanoa ma le Kapeneta. A uma, o i ina foi la, e toe fai ai isi suiga. A uma loa le mea lea, ona toe fono loa lea o le Kapeneta, fai loa ma le latou faaiuga aumai loa lea ma le Tala o le Tupe i totonu i i. A uma loa ona fai le saunoaga a le Minisita, ona faatoa alu ai loa lea i o i le Komiti. Aisea? Leaga foi o le Tala o le Tupe e i lalo o le Tulafono o le faasoasoina o tupe, e na o se mea e tau faaofiofi. E faapena uma lava Tulafono e aumai ai iinei. O le Tulafono e tau faaofiofi, ona ave loa lea i o, valaau loa lea e le Taitaifono o lo o saunoa nei, ma le latou Komiti e toe avatu uma lava Matagaluega taitasi ma toe justify, justify i luma o le Komiti pe faamaonia, mea nei.

Se ua leva ona e silafia na mea, toe justify. O la e i ai le power o le Komiti, e na o le power e toese ai ae leai se power e faaopoopo ai. Afai loa e latou te silafia ua ova mamao le mea lea, tipi loa e latou, ina ia atagia ai le mea e pito amiotonu, e ono maua. Ae manatua foi, o tatou lea e estimate, e pei o le upu lea na fai nei i le taeao. O tatou e fuafua, ae o le Atua e faataunuuina. E na o le fuafua lava, aua e tatou te leiloa le mea e tupu taeao. O le ala lena e fai ai le tatou Tala Faaopoopo o le Tupe. Tasi, lua. A oo mai loa ia ni faafitauli, ona toe fai lea o le Tala Faaopoopo o le Tupe, e toe fai ai isi fetuunaiga. O le tulaga lena, sa ou faapea e te le tau fesili. Aua afai e out, faaletonu le estimation ona o ni faalavelave ua tutupu, lea e i ai le avanoa e toe aumai ai le isi Tala o le Tupe pe aumai toe faaitiiti, pe aumai toe faatele.

Ua fia nei Tala o le Tupe o lenei tausaga lea e faaalu nei toeitiiti uma, ua fia? Ua tolu Tala Faaopoopo, fa i le Tala o le Tupe mo le tausaga fou o lea e alu lava le fetuunaiga, ina ia uma ifo le tausaga ua maua le vaegatupe sao

lava lea sa faataoto mai, ae e iloilo foi, po o le a le poloketi, po o le a le mea o le a le faataunuina, ia e tasi lena saving. E pei la o lenei, e i ai atinae ia ua le mafai ona fai ona o le Koviti, ia tasi lena saving ia aumai tuu totonu o le Tala Faaopoopo o le Tupe lona tolu, o lea ua tolu.

Lau Afioga i le Fofoga Fetalai o le fesili la lea, pe sao mea ia, ia o le tali lena. Afai e i ai sina le talafeagai, e i ai le Tala o le Tupe e faa-talafeagai ai le fuafuaga ma le mea e tupu. Leaga o tatou e fuafua, a o le Atua e faataunuina.

FOFOGA FETALAI: Malo faafetai, ou te faamalulu atu...

Susuga Hon Laauli Polataivao Leuatea: Ioe lau Afioga i le Fofoga Fetalai, ia paga lava lea o lea e taumafai atu so matou lagona ae taofiofi mai lava.

FOFOGA FETALAI: Ou te faamalulu atu i lou finagalo. Ia e malie...

Susuga Hon Laauli Polataivao Leuatea: Ia afai e paopapa, ua lava lea ma le faaaloalo.

FOFOGA FETALAI: Ia e malie, ona ne i faauiga sese lo matou taumafai atu. O lea ua tulai atu le Palemia e faamalamalama le vailiu lea sa e tulai mai ai, ona o lea foi sa e i totonu o le Kapeneta, ia o faiga na e le faapea pe faapito tasi. A uma ona aumai i lea vaega o le au atamamai, tuu mai i lea vaega, aumai i le Loia Sili ma le... ia e faapena ona tuu atu i le Kapeneta, toe tuu mai i le Palemene, ave i le Komiti, e toe amiami foi e le Komiti Ofisa Sili o Pulega o Matagaluega ma Faalapotopotoga, e faapena ona latou screen ina le mea o le Tala o le Tupe.

A o lau mataupu lea e tau fai atu, e malie o lau mataupu lea e te tulai mai ai, se i o tatou oo atu i mea taitasi. Ia ona e tulai mai lea i le tulaga e pei ona.. a o le tulaga lea, leai o le aotelega ia ma tulaga tau i le tamaoiga ma faavae. E pei o le tulaga lena e faamalulu atu ai, e le o se taumafai o le Nofoa po o le Malo e taofi lou avanoa, ae o le taumafai atu o le Malo e faamalamalama ae taumafai atu au e tatai i a tatou Tulafono Tumau. O le eseesega lena, e faamalulu atu ai i le Afioga i le sui usufono mamalu.

Tulai mai lau Afioga i le Taitaifono masalo po o manino auofala i mea uma o lea, ioe e pei ona e saunoa i ai o le Tala, Tala Faatatau, Faatatau.

Afioga ALIIMALEMANU ALOFA TUUAU: Ioe, ia tatou oo loa i le Tala Faaopoopo Lona ona Tolu 2019/2020, o a tatou tupe maua faaopoopo \$3,741,430, ia o vaega lea sa ou taua, o ia vaegatupe sa maua mai i fesoasoani i le misela ia faapea lafoga o penisini ma suaau. O tupe alu faaopoopo i le Tala Faaopoopo lona Tolu lea, e \$6,905,724 ona maua ai lea

o le Tupe Pau Faaopoopo mo le tausaga lea o le a faaumaina i le masina nei 2019/2020, e \$3,164, 294.

Ia e momoli atu le faafetai ma le faamalo i lau Afioga i le Minisita o Tupe, e pei lava ona taua faiga faavae lea sa fua i ai iloilogaga a le Komiti o Tupe, pe na mulimulitaia ma usitaia. Faafetai foi i le Pulega a le Malo, ona o lea ua matou mautinoa, o lea sa limataitaiina lava le tapenaina o le Tala Faatatau o Tupe 2020/2021 faapea foi le Tala Faaopoopo, i taiala ma faiga faavae tau tupe a le Malo.

Faafetai i Ofisa Sili o Pulega ma aufaigaluega uma a Matagaluega ma Faalapotopotoga ma e uma sa tapenaina le Tala Faatatau o le Tupe, e ui lava ina outou faatiga ulu i nisi o taimi i le Komiti Tupe, o nisi o outou, ae o lena ua matua manaia lava. Faafetai, faafetai lo outou talimanao. Faafetai o lea ua matou matauina le tou aofia i totonu o galuega faatino mo poloketi, sa le masani ona tuuina i totonu, ua atoatoa ai le faatinoina o le galuega.

Pau le mea o lea sa taua, o le tatou delivery, ona e matauina, e laitiiti le pasene ausia, ia ae o lena ua outou iloa lava ma silafia mea sa ala ai ona fai ma tutaia ma le vave le faatinoina o poloketi lea e i ai tupe totoe i faaiuga o tausaga. Ia e talitonu o lena ua outou malamalama lelei i tulaga e tataua ona faatino ai ma agai ai pea i luga le tatou galuega. O le agaga o le faafetai, o le tele o suiga lelei improvements, ua mafai ona faatinoina, i lenei 5 tausaga o le a maea.

E faafetai faapitoa i le Ofisa Sili o Pulega o le Matagaluega o Tupe ma le aufaigaluega a le Matagaluega i galuega fita sa feagai ai. Malo le galulue, ua outou matauina o lena ua i totonu o le Lipoti a le Komiti Tupe ia lisi taitasi o poloketi mo Matagaluega taitasi ma Faalapotopotoga, ina ia mautinoa ai le tatou mulimulitaia, ina ia faatino i taimi faatapulaaina pe a talafeagai ai.

Ia, o lo o faaautu i le Tala Faatatau Autu o le Tupe lau Afioga i le Fofoga Fetalai o le 2020/2021, le tatou lalaga faatasi o se lumanai manuia ma le mausali mo Samoa, ona o le talitonuga o le sa o Samoa e fau tele. O le naunautaiga ia ogatasi le futia ma le umele, ia galulue faatasi foi le tuulau ma le lavelau, aua e mafai lava ona tatou toe faafoisia vave lo tatou tamaoaiga, i se tulaga maua luga pe a tatou galulue faatasi. O lo tatou valaauina lea, o tatou o Taitai o Samoa. Ia tapena malosi le tamaoaiga, mamalu ma saogalemu Samoa mo a taeao.

Lau Afioga i le Fofoga Fetalai o nai manatu mai si o matou itumalo Alataua Sisifo. O le tele ia o manatu taua ma le matagofie sa faaalua e sui usufono mamalu, ia aua le tatou tali atu i le tulaga ua i ai le tamaoaiga o le atunuu, ona o le tatou sa e fau tele. O lea ou te le tuliloaina la le lauamanu ae o le a vaai i le faamulioatu, ona e taua i le Alataua i Sisifo le faamulioatu.

O le folasaga matagofie tele o lenei vaiaso lea sa faatepa ai le Maota Fono, i aso ua tuanai, le history, Tala o Tupe Faatatauina a le Palemene, i le laiti o Tupe sa Faatatauina i tausaga taitasi ua tuanai, ma sa laiti foi nai aitalafu sa faamoemoe i le koko ma le popo.

O le taua tele la o lea faamanatu, ona e le gata e aoaoina ai nisi o tatou i mea sa tutupu i le Palemene i aso ua tuanai, ma vaegatupe sa mafai ona faatatauina, a o le itu taua i le Alataua i Sisifo, o le fai ai lea o lana fua faatatau, faapena foi i sui usufono o itumalo taitasi, e pei ua i ai ni suiga ina ua maea mai ia le 40 po o le 50 tausaga talu ai. E fai lava le fua a le sui usufono ia, e faatatau i le matua o lona soifua. Pe ua a mai Samoa i lenei vaiata ma lona tamaoaiga? Pe fua le siitaga o le tamaoaiga, pe fua i Tupe Faatatauina? Ia pe faaoga foi le GDP lea sa faaoga mai e le sui usufono o Faleata i le po anapo? Faleata Nu.1.

Ou te manatua pe a ou sauni ou te sau i Apia i le aoga i aso ia, e ta loa le 9:00pm i le po sau loa le pasi a lo matou nuu, aua foi e 3 i le 4 itula o sau le pasi i le leaga o auala, ia ona matou omai lava lea matou faasau ai i luga o le uafu. Sa i ai le fale lenei, sa tu vae atu le paia o le Maota nei, le mamalu, o fale sa fai ai e tuu ai pusafai i lenei vaiata. Ia ona omai lea faamalumu i ina, a oo la ina timu, ia e oo mai lava iinei i Apia i le aso e sosoo ai ua matua pala lava.

Ia o vaa na i lenei vaiata o le Petilu ma le Sulimoni, toeitiiti foi tai tolu itula o sau. A oo la ina sou le vasa, ia e te susu mai lava i Salelologa e oo mai iinei. Ae tele ina tau faasoasoa, e tele lava ina uma le aso o faala i luga o le uafu, ia ona o lea e sue nai aiga i ina i Salelologa ma Faasaleleaga ia e mapu i ai i le po, ona toe usu foi lea i le vaveao i le uafu ona sa tau faasoasoa mai vaa.

Ou te manatua foi, e tasi lava le tanevai a si o matou nuu e tu i tala ane o le fale o le matou faifeau ia o i ina e ti vai uma i ai le nuu. A oo la ina mugala ua leai se vai o le tane, ia ona faaoga loa lea o vaieli e feinu ai le nuu. Ia e na o le taitoatasi ia ni tamaiti o le itumalo e maua se avanoa sikolasipi pe a laki. Ia e faapena foi i aoga iinei i Apia, e le tele ni avanoa e maua mai e aoga ai i nei i Apia i kolisi maualuluga. Ae a oo la ina o le a tuli ta ita ina ua leai sota pili, ia ona tau sue lea o se isi o le nuu, e alu i Savaii ma le tusi, e tau ai o lea o le a tuli ua leai se pili, aua foi sa leai ni fesootaiga televavave i lenei vaiata. Sa mafai ona fai feau faauaealesi, ia, ae o le a iloa uma ai e le atunuu le leai o se pili. Ia ae leai foi ma se tupe e ave ai se feau faauaealesi.

Sa toaititi le aofai o tagata o le atunuu, ae na o nai mea laiti lava na e fai ma faataitaiga, ae anoano mea e fai i ai le fua o le aoga o le aumai o le tuanai, mo le lumanai aemaise le taimi lenei. Fai lava le fua a le sui usufono ia o le itumalo po o a mai lona itumalo i le tamaoaiga, pe a fua i le 40, 50 tausaga ua tuanai. Sa leai foi ni faletalimalo i lenei vaiata i Savaii, ae o le taimi lenei, ua tele pisinisi faletalimalo ua faatuina i totonu o le atunuu.

Ou te manatua foi, sa na o le lua lava faleoloa i lenei vaiata, i o i lo matou itumalo ma lo matou nuu foi. E na o le faleoloa a Eveni ma le faleoloa a Nelesoni.

Ia toe oo mai lea o le tala i le tele o faletalimalo la ua i ai i Savaii, aemaise foi o fale tu matafaga, po o apitaga i matafaga, e maua ai tupe a nai aiga ma

pisinisi. O faletalimalo o le vaega lea o atinae sa ave ai le faamuamua a lo tatou Malo mo le siitia o le tatou...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

FOFOGA FETALAI: Se i tulai mai le Palemia.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Se i ou fesili atu lava i le sui usufono, o le a lau vaai i faletalimalo ia, o lelei le faagasologa, o lelei le atinae? E te vaai i ai pe e te silasila i ai i atinae ia o ni atinae na faamafua ai Paala? Ae pei ona saunoa i ai se tasi o sui usufono, o mea uma nei o mea na fai e Paala. E mafai ona talanoa mai pe na aoga atinae ia i le tou nuu?

FOFOGA FETALAI: Se i tulai ia le... malie le sui usufono, malie le sui usufono...

Tofa Olo Fiti Afoa Vaai: Lau Afioga i le Fofoga Fetalai mo le faasaoina. O le fesili lea ou te fia fesili ai, ou te fesili atu lava i le sui usufono...

FOFOGA FETALAI: Malie le sui usufono...

Tofa Olo Fiti Afoa Vaai: Ou te fia fesili atu lava i le sui usufono po o le a sana fua i ai i le 1970, e na o le \$4 miliona le tupe na maua, ae ua 115,000 le aofaiga o tagata Samoa, ma le taimi la lenei ua \$800+ ma ona tupu miliona, ae o lea lava e 100,000 ma ona tupu le aofaiga o tagata Samoa.

FOFOGA FETALAI: Malie le sui usufono, o lea o le a e toe lauga...

Tofa Olo Fiti Afoa Vaai: A fua i pasene, o le a le eseesega? E sili atu ona tamaoaiga Samoa i aso ia na i lo le taimi nei.

FOFOGA FETALAI: Malie le sui usufono, e fesili i mea sa laga i lau saunoaga ae te le i lauga i le tulaga lea e lavea ai le aofai o lo tatou atunuu. O le mea la lea e malie le sui usufono, se i... o le fesili lava a le Palemia ia e faamalamalama ia le saunoaga a le sui usufono mamalu. E malie o le a...

Tofa Olo Fiti Afoa Vaai: Lau Afioga na ou laga le mataupu lea...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

Tofa Olo Fiti Afoa Vaai: O au tonu lava lea e saunoa i ai le Taitaifono.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O le mea e fia faasao...

FOFOGA FETALAI: Ua lelei o le a...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O lou tulai atu, o lea ou te fesili i o i le Taitaifono, pe ni mea lelei ia ua fai e ono fai e le Atua, po o ni mea lelei e afua mai i le atua faapaupau o Paala? E faapena le faiga o le tatou Fonotaga. E le o le tu atu o au i o se i aumai se faamatalaga, ae e faalavelave mai ia te au. E le o fesili atu ia te oe se i vaavaai ia tatou Tulafono Tumau. Ma e tau usitai i le Nofoa.

O lea ou te fia malamalama o lea ou te fesili atu i o, pe o le a sana vaai i nei atinae manaia e fai e lo latou itumalo? Pe o ni atinae e afua mai i le alofa tunoa o le Atua o lo o musumusuina ai ia outou tagata tau atiae po o ni mea e afua mai i le atua faapaupau o Paala?

FOFOGA FETALAI: Ia malie le sui usufono, se i fai atu lau tala lea..

Tofa Olo Fiti Afoa Vaai: O Paala o le HRPP. O le mea tonu lena na ou fai atu ai, o Paala na ou faatusaina ia oe.

FOFOGA FETALAI: Ia malie le sui usufono, ou te le o manatua se sui usufono sa na taua Paala. Ae o lea la ua ou toe manatua nei, leai o lau Afioga lea na faapea o tatou lea e tapuai ia Paala.

Tofa Olo Fiti Afoa Vaai: O oulua uma lava o Paala.

FOFOGA FETALAI: Na ou manatu e aveese au saunoaga ia mai le tatou Fonotaga. Ia ua ou faapea e taoto ai pea, se i fai mai tupulaga i le lumanai e silasila i le saunoaga a lau Afioga. Ioe, o lea e tatou te tapuai i le Atua o lo o faavae ai Samoa, Faavae i le Atua Samoa. Ia ae o lau saunoaga lea ua ou toe tilotilo atu nei, lea e faapea mai, o Samoa lea e tapuai ia Paala.

O le mea la lea ou te faamalulu atu, aua tatou te toe foi i lea mea, ae o le fesili lava latou a le Palemia, o au foi lea e tuia le loto. Aua o lo matou nuu, e lua vaieli na feinu ai Fasitoo, e fa pitonuu. O le vaieli e tu i lou lumafale ma le vaieli e tu i lumafale o Tuilaepa lea Aiono Tuilaepa lea i Fasitoo ae

feinu uma iai le nuu. I le taimi nei, o isi aiga ua tai lua paipa. Ioe, a ua maua le paipa vevela ma le paipa malulu. E pei lava o la e i Amerika, ioe.

A ou fua la i le saunoaga a le Taitaifono i le 40 tausaga, o lea e saunoa le Taitaifono ae maligi ou loimata. Ioe, ou te manatua mea o le mativa sa i ai i nai toeaia ma matua. Ae a le taimi lenei? E oo i isi aiga e tai 8 taavale e tutu i le fale ae leai se isi o faigaluega.

Ia se i tulai mai lau Afioga i le Taitaifono, ia tau faapuupuu lau saunoaga leaga o lea e maligi ou loimata i lau...

Tofa Olo Fiti Afoa Vaai: Lau Afioga o se mea e fia faasao. E matua sese le faauigaina o le Paala lea na ou fai atu ai.

Afioga ALIIMALEMANU ALOFA TUUAU: Ia...

Tofa Olo Fiti Afoa Vaai: E leai ana faapea o ositaulaga Samoa i le Atua ua leva ona tali mai. Ua le toe matitiva Samoa. A o le taimi lenei, o lea lava e matitiva lava ae o lea foi ua toe tulai mai.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, e i ai le upu foi lea...

FOFOGA FETALAI: O lona uiga se i...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: E mau lava e faalele, mau lava e faalele, ae i ai e matau. Mo le naunau, naunau e lafo upu i totonu o le Maota, o lea la ua ou toe tuliloa atu, aua o le agaga atoa o le saunoaga lea na aumai, o nei atinae lelei uma, e tasi lava le mea e afua mai ai, ona o lea e tapuai le atunuu ia Paala. Ia se i silasila i le matuia o nei upu, ae e fai i totonu o le atunuu e faavae i le Atua.

O le ala lena, a omai i totonu o le Maota, aua le soona lafoa upu, aua le soona lafoa upu. O le Maota lenei e mamalu tele toe faavae le Malo lenei i le Atua. Ae o le soona lafo mai o upu faapea, lau Afioga i le Fofoga Fetalai, e toe tuliloa ai lava oe i au upu. Ma o lau lauga atoa e tali atu ai i le Kapeneta, o le a ou agai lava ia Paala, ia ma le atinae atoa o le atunuu lenei. Se i silasila ma faafogafoga mai lou itumalo i le ituaiga sui usufono na latou auina mai, e tapuai ia Paala.

Tofa Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia malie...

Tofa Olo Fiti Afoa Vaai: E manino lelei lou itumalo i le faaoloataua lea e fai.

FOFOGA FETALAI: Tatou see ese i se isi mea.

Tofa Olo Fiti Afoa Vaai: O la e manino lou itumalo. E te fiu e faapena ma faasese lou itumalo, e toe oo foi i le tausaga lea ou savalivali mai.

FOFOGA FETALAI: Ou te faamalie atu i le sui usufono mamalu, ae taoto ai faapea lea mataupu. Ia ae ou fautuaina le Afioga i le Taitaifono, se i e vave see ese, e te matau mai, o lea ua tele ina maligi loimata o le tatou Palemene nei i lau saunoaga. Aua e leai lava se isi o toe mafaufau i le taimi o aso ia i nai o tatou matua i le mea o le... ioe, e ese le faigata, sa tau sue ni pasese o aoga, ma mea faapeana. Ia, e sao lelei e leai se mea e sese o lau saunoaga. Ia sei vagana le tagata na soifua i fafo sau ai i inei ua matua e na te leiloa le pologa o le struggle o lo tatou olaga sa i ai.

Ia o le mea la lea, tulai mai.

Afioga ALIIMALEMANU ALOFA TUUAU: Ia faafetai mo le avanoa, ia o le a oo la i mea manaia. O le fesili e uiga i faletalimalo, ia, o lea o le a oo tonu lava i ai lau tala. O le vaega lea o atinae lea sa ave i ai le faamuamua a lo tatou Malo, lea sa ala ai ona siitia le tamaoaiga. E pei ona fai atu le tala i le tele o faletalimalo ua i ai e le gata o Savaii ae o Upolu, ae faapea foi ia apitaga, e maua ai nai tupe a nai aiga ma pisinisi.

O le faamaumauga lea sa i ai i le talanoaina ma le Matagaluega o le Turisi, i le tatou tamaoaiga, lea e i ai faamaumauga, \$347.5 miliona tupe sa maua mai ai i le 2014/2015 mai faletalimalo, fesoasoani i lo tatou tamaoaiga. 2015/2016, \$385.1 miliona, 2016/2017, \$387.6 miliona, 2017/2018 \$454.2 miliona, ia ma le 2018/2019 na siitia i luga i le \$514.1 miliona. Sa maua mai i lea vaega taua o le atinae lea sa ave i ai le faamuamua a lo tatou Malo. Ua ala la ona ou auiliiliina atu ia vaega, ona o lea ua matua aafia le vaega lea sa faamoemoe tele i ai lo tatou tamaoaiga. O lea ua leai po ua tau leai foi se tupe maua o toe maua i lenei vaitau. Ona i ai lea o ni fesili e faatupu manatu, e le gata mo i tatou uma, ae faapea foi le Kapeneta.

E le o manaomia la se tali mai lau Afioga i le Fofoga Fetalai, e na ona faatupu manatu. O le fesili muamua, o i ai ea so tatou lumanai i le vaega o faletalimalo? O i ai pea so tatou lumanai i le vaega o faletalimalo? Po o se faamoemoega mai i o tatou faletalimalo mo le tamaoaiga o lo tatou atunuu i le lumanai o i ai pea? Ia tailo, e na o matematega ma faatatauga ae taua pea lo tatou nofo sauniuni.

O le fesili lona lua, sa tatou sapaia ma le fiafia le siitia o le tatou tamaoaiga ona o faletalimalo, fale apitaga, beach fales ma tagata tafafao maimoa mai fafo. Pe na tatou over invest ea i le faletalimalo pe leai? E i ai upu faa-

Peretania e masani ona faia e tausi tusi lea e saunoa soo foi i ai le Afioga i le Palemia, 'Don't put your eggs in one basket'. E na ona faatupu manatu.

Sa saunoa le sui usufono o Anoamaa Sisifo e uiga i le tatou vaalele ma ou te manatua le tapisa o le Maota lenei ona o le popole i mea sa tutupu i le Polenisia, ae sa lagolago e lo matou itumalo lea atinae taua ona o le auaunaga mo le atunuu ma le tuualalo sa tuuina atu, manaia ae lua ni a tatou vaalele. Lea la ua faaletonu mai ma vaalele, ona ou faapea ifo lea, se e faafetai lava e le i lua ni vaalele e aumai i lenei vaitau.

Ia leaga e leai se isi e fai se atinae ina ia gau. O le naunautaiga ia manuia ai le atunuu. Ae o le mea taua, o le auaunaga i le atunuu. O se lagona foi lena o Alataua i Sisifo lea sa maua atu e le sui usufono o Anoamaa i Sisifo ia lo tatou vaalele ia ma o le a tatou...

FOFOGA FETALAI: Ou te vaelupeina le saunoaga matagofie a lau Afioga i le Taitaifono, ona o lea ua tatou taunuu i le tatou malologa masani. O le a maua le avanoa e faaauau ai pe a taliu mai le tatou malologa.

Ou te faasilasila atu o le a faataatiaese Galuega a le Fono Aoaofa Faitulafono mo lana malologa masani.

Na faataatia ese Galuega a le Fono Aoaofa Faitulafono mo lana malologa masani i le itula e 10:45 i le taeao ma toe faaauau i le itula e 11:30 i le taeao.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

E i ai le manatu ua faapena ona maua le isi faaopoopoga e maua ai se faasiligamalosia o le paia o le Palemene aemaise foi o Ofisa Sili o Pulega o Matagaluega ma Faalapotopotoga e faaauau ai le tatou galuega.

Ae ou te le i tapa le Taitaifono o le Komiti e faaauau le saunoaga, e i ai le lafo e fia tuuina mai. E tapa lau Afioga i le Taitai o le Maota mo se lafo.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e momoli atu le faamalo i lau Afioga faapea foi le paia maualuga i a outou Afioga i sui usufono mamalu o le Palemene o Samoa, ua maea le taumafaga mama i lenei taeao

fou. Ae o lea ua tatou agai atu i le vaega mulimuli o le tatou Fonotaga mo lenei aso. Ae matauina foi o le aso mulimuli lenei o lenei vaiaso sa faaaogagase le mamalu o sui usufono i le ao ma le po talu ona amata mai le tatou Fonotaga, ua ou manatu ai e faasaosao le malosi, e le uma le faiaso o le Atua.

A ta loa le 12:00 ona tatou malolo lea, faaaau le tatou galuega i le vaiaso fou, o le mea foi ua le uma le fia eva ma talatalanoa i a outou Afioga. A maea foi le Fono ona tatou taapeape lea, ae lelei ona faaumiumi le tatou Fono ia matua sua lava le aulapatai ma le aulapauta, ia matua sasaa lava faoti le utu a le faimea i le tulaga o finagalo sa faaalua, ma o le a faapena foi ona taumafai le Kapeneta e tali atu pe a oo mai i le matou taimi. A o lea ua taoto le lafo, a o le agaga maualuga lena ia te au ma le Kapeneta, ta loa le 12:00 tatou malolo.

Lau Afioga i le Fofoga fetalai, ou te faatu le lafo, *Ina ia tolopoina Taualumaga a le Fono Aoa o i le itula e 12:00 i le aoauli nei ona faaaau lea i le Aso Gafua i le vaiaso fou, 22 o Iuni i le itula e 9:00 i le taeao.*

O le lafo lea mo le faamaoniga a le Maota.

Faamaonia e le Minisita mo Galuega, Felauaiga ma Atinae Eese, Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

Na toe faaaau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.

FOFOGA FETALAI: O le a faapena ona fai pei ona faatuina mai le lafo pei ona saunoa ma malele i ai le Afioga i le Palemia po o le Taitai o le Maota. Ou te tapa ma le faaaloalo lau Afioga i le Taitaifono o le Komiti o Tupe.

Afioga ALIIMALEMANU ALOFA TUUAU: Faafetai i lau Afioga i le Fofoga Fetalai. Ia atonu o lea ua saualo le taligasua maua se isi faasiliga malosi.

E fai le tatou malologa o lea ua lua nai fesili faatupu manatu ua tuuina atu. A o le fesili mulimuli lona tolu, o le fesili lea, po o le a faapefea ona tatou tali atu i le faaaauina o le lumanai o atinae ma pisinisi faletalimalo i nisi tulaga faapenei pei o le Koviti-19 e ono oo mai i le lumanai. Ia, o fesili na e faatupu manatu i sui usufono uma aemaise le Kapeneta aua ua tele a tatou

tupe ua alu i atinae. Ma e le faapea la a leai loa ni pisinisi tatou te maua mai ai ona faatuatuanai lea i ai ae fai nisi atinae. E tele tupe a le Malo o nai pisinisi foi aemaise foi o fesoasoani a le Malo i le tauatinaeina o ia atinae taugata aua le tamaoaiga o le atunuu. O le upu o le Tusi Paia i le Kalatia fai mai; “Ia outou fesui ai i a outou avega e amo, ma ia faapea ona outou faia le Tulafono a Keriso.” E faauma atu ai a matou fesili i lena faaupuga mai le Tusi Paia.

I le Tala Faatatau o le Tupe 2020/2021, e 15.1% o lo o faaaluina i le soifua maloloina, 14.7% o lo o faaaluina i le Matagaluega o Aoga, 8% i le Matagaluega o Galuega Tetele e aofia ai ma le LTA, 2.3% i le Matagaluega o Pisinisi, Alamanuia ma Leipa e aofia ai le tatou tourism, 2% i le Matagaluega o Faatoaga ma Faigafaiva, ae 3% le Matagaluega o Punaoa Faalenatura.

Sa faataua e le tele o saunoaga a sui usufono mamalu o le Palemene le tatau ona tatou toe foi i faatoaga ma faigafaiva ona o le aafiaga o le tamaoaiga. Faafetai i lau Afioga i le Minisita mo tiapula ia sa tufa atu i nuu i tua, o la e sa tofu lava le aiga ma le tai 3 tiapula. I si o matou vaivaiga, e manaia i tulaga faapea ona faa-community projects, o se matou vaivaiga lea i faifaatoaga i nuu i tua ina ia mafai ona i ai se sao o nuu pe a tuufaatasi a latou resources. E matauina lava i nuu i tua, a lelei nei e pulea le nuu aemaise lava e o lo o faia upu o le nuu ma toaaga e o e fai maumaga, e faapena foi ona toaaga tagata o le nuu, aemaise lava le malosi o le nuu, taulelea. E le afaina faifaatoaga taitoatasi, lea ua lelei ma mafai ona aumai lo latou sao e ala i fua o faatoaga po o faigafaiva foi mo maketi i fafo.

Ae pei o le agaga lena, a lelei alii ma faipule i tua o e o lo o pulea nuu i faatonuga nei ma a latou fonotaga nei o asiasiga maumaga, ou te talitonu lava e mafai ona toe uunai le tulaga lea pe a tuufaatasi, faa-community project. O se isi foi mafauauga o i ai mai le Alataua Sisifo, o le tulaga lea faaitumalo. Mo se faataitaiga e tau faalautele ai se manatu, mai le Itu Asau atoa se i tau atu i Falelima, e manaia lava ae i ai se isi e fai ma sootaga e encourage ai le commercial farming lea i itumalo nei pe 4, ave i ai tools i se isi e filifilia e fai latou ma faitotoa i fafo e ui ai le aveina i fafo o faaeleeleaga a lena itumalo, aemaise lava e mamao mai tatou i o i Savaii, ona faitalia lea o le agent lena ma ave fua na o faatoaga. Na o nai mafauauga e tuuina atu e faatupu manatu i lau Afioga i le Minisita mo Faatoaga ma Faigafaiva.

Lau Afioga i le Minisita mo le Soifua Maloloina, faafetai i lau Afioga ma le Matagaluega, malo le onosai ma le auaunaga. Ua matou malilie o matou loto i lau tautua matavela ma le Matagaluega aemaise foi o le Komiti o lo o nafa ma le puipuiga ma le latou fautuaga, aua le saogalemu o le tatou atunuu.

O lau faafetai faapitoa lava o lau faafetai i le Pule ma le Suetusi Sili o le tatou Malo. Ua matou matauina ma le agaga fiafia le up to date uma o accounts po ua mafai ona sueina uma tusi aemaise lava o le tulaga lea pei ona taua e se tasi o sui usufono. O se taimi muamua lea ua mafai ai ona

tuuina mai faamatalaga o tupe o le isi tausaga ma uma foi ona lauliliu e le Komiti o Tupe ma tuuina mai i le Palemene ae le i tapenaina le isi tala faatatau o tupe. O lo matou agaga fiafia lena ma le agaga faafetai ua le toe i ai se backlog o i ai, ua up to date uma a tatou accounts. Ae le gata foi i lea, o a tatou Lipoti Faaletausaga pe toe toatolu pe toafa, ou te iloa o lea ua faamaea mai. Faafetai i le Pulega o le Esetete Tausi i fua o faatoaga ua matau atu foi le tatou fale i Papakura lea ua faaoga aua lea tulaga, aemaise foi o la outou taumafaiga lea aua le gaosiaina o le eletise, le bio-mass project o lo o i ai. E i ai le \$1 miliona lea e i le Tala o le Tupe lea e faapea e ave e totogi ai nisi e galueaina faatoaga aemaise ai o le fesoasoani mo nai tagaeta ua leai ni galuega. O se manatu e manaia ae ave nai tagata ia e toe faafaigaluega i le Esetete Tausi ona ua matauina pei ua toe ola mai le Esetete Tausi i lenei vaitau. Malo galue i lau Afioga i le Minisita ma le aufaigaluega aemaise foi le Pulega.

Faafetai lau Afioga i le Minisita o Galuega ma le Pulega a le Laueleele ma Felauaiga le LTA, malo le onosai ma le faasoa, aemaise o le Ofisa Sili ma le aufaigaluega a le Pulega o le Laueleele. E matau atu o lea ua faaletonu mai le atinae o faletalimalo ae o lo o faagasolo pea i le atoa a tatou galuega o auala ona tatou te faamoemoe i i e maua ai ni galuega a nai tagata nei i konekarate fai auala aua le tamaoiga o le atunuu. Faafetai i le aufaigaluega uma lava.

I le asiasiga a le CDC i galuega tetele i Upolu ma Savaii, na ou lagona ai lava le agaga faafetai i le Atua i le tomai ua oo i alo ma fanau a le atunuu, pe a ou vaai i galuega tetele ia sa faatino ma le fesoasoani foi i a tatou paaga mai fafo e ala i e sa fesoasoani mai i le faatinoina o ia galuega. I lau vaai i ai i o i le auala laupapa i le Maliolio faapea le hydro i Fagaloa aemaise foi le lake lea e faasau ai le vaitaumafa o Lepa ma isi afioaga na, ona ou nofo lava lea ma ou maofa i le tulaga ua i ai le tomai o alo ma fanau i le faatinoina o ia galuega tetele. O i e faataua ai tele ia tatou ia le tulaga tau aoaoga ona ua alu i luma le tomai o fanau, tatou te manaomia tele lava latou nei aua le atinae pea o galuega tetele mo le manuia o lo tatou atunuu.

Faafetai i le aufaigaluega a le Matagaluega o Tupe i le taimi muamua lenei ua maea ai ona aumai i totonu o le Palemene pei ona taua le faamatalaga o tupe a o le i tapenaina le tala faatatau o tupe. O matatia tetele faapea e faigofie ai ona fua pe na a mai ona faatino galuega. Malo ia te outou le galulue, faafetai le faasoasoa ma le pulega lelei i lau Afioga i le Palemia ma le Kapeneta ona o taimi faapenei e iloa ai le tautai matapalapala. Ona o lea e matau atu o lo o lava pea le tatou foreign reserve mo le okaina o tatou oloa mo le isi 7 ma le afa masina.

Ia o nai manaoga o si ou itumalo. Lau Afioga i le Minisita o Tupe ma le Minisita o Aoga lea ou te le o vaai atu i ai, na ona toe faamanatu atu lava le faleaoga o si ou itumalo. E matauina lava ma le agaga fiafia le toa 100 o faiaoga ua faauina i le tatou polokalame foi lea o le toe...

FOFOGA FETALAI: Se i tulai mai le Minisita le fetalai ia Toeosulusulu, le Minisita mo Fesootaiga, Faamatalaga ma Fesootaiga Vavave Faaneionapo.

Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Lau Afioga i le Fofoga Fetalai, ou te tulai atu lava ma le faaaloalo, o si mataupu lea e fia faamalamalama atu. Ou te tulai atu lava ma le faaaloalo ona o lo o faafofoga le atunuu foi e le o paau le Afioga i le Minisita mo Aoga i leni taeao, ona o lo o feagai le Minisita mo Aoga ma le Afioga i le Sui Palemia ma se fonotaga faatopetope a le laulau a fono a le Iunivesite o le Pasefika ona o faafitauli o lo o tulai mai.

O manaoga lava o sui usufono taitasi o lo o tuuina mai, ia o lea ua faatonuina le ulupoo lea e i ou tua le Afioga ia Lealailepule e faamaumau uma tulaga ia aua le...

FOFOGA FETALAI: Ia, se i tulai mai le Minisita mo Tina ma Tamaitai, Atinae o Nuu ma Afioga ma Agafesootai.

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, se meamanu o lea ua maua si laolao lea sa faatalitali se i maua se avanoa ona e i ai le mataupu lea sa saunoa i ai le Afioga i le Taitaifono e taua ai le pulega a alii ma faipule. Sa faatalitali pe te i ua agai mai se mataupu i le matou Matagaluega ona ou tulai atu lea e faamalamalama faatasi ma le vaega lea sa taua. Ui ona o lea sa agai i le Matagaluega o Faatoaga, ae ou te fia tautala i ai ona tasi lea matafaioi o lea o lo o faagasolo nei a leni Matagaluega, atonu ai ua maua e le sui usufono mamalu, o lo o i ai le polokalame lea a le matou Matagaluega, o lea sa faagasolo i itumalo i tua lea e taua o le district development plan, o le atinaeina lea o itumalo taitasi, o lo o taumafai ai ina ia faamaopopo komiti a itumalo e i ai uma sui o itumalo ma e taitaifono ai le sui o le Palemene, lo latou sui usufono. O lo o i ai la taiala lea sa taua foi i totonu o leni fonotaga a o faagasolo leni fonotaga, e fausia i itumalo taitasi faatasi ai ma le latou sui usufono taiala nei ua uma ona faatalanoaina ma soalaupule faatasi ma le Matagaluega i totonu o polokalame ia e faagasolo atu i tua, lea sa faataamilo ai i le 48 itumalo lea sa faagasolo ai le polokalame leni. Ona fausaia lea o taiala nei i lalo lava o le vaaiga a itumalo taitasi ia po o a atinae e manomia e ave i ai le latou faamuamua, ina ia mafai ai ona fesoasoani atu i ai le tatou Malo e faatino manaoga ia.

O le agaga o lea faamoemoe, ina ia avea ai lea poloketi o se meatotino lava na fofoa mai totonu o le afioaga ae le o se talaiga a le Matagaluega po o le

Malo e faatonuina ai le mamalu o le atunuu ina ia faatino le mea lea, faatino le mea lea, o le ownership. O le agaga lena o le taumafaiga lea, ia i ai le sense of belonging and ownership within communities e fausia ai lava e latou ia manaoga ua silisili ona manaomia i lea taimi ma lea taimi ona faamau lea i lalo e fai, o lea lava e taua nei o taiala ia e aumai le tatou Matagaluega ona faasoa lea e le tatou Matagaluega ia i latou, ia tatou donor partners ma saili isi auala e mafai ai ona faatino taiala nei.

O se taimi mulimuli o le a ou agai atu i le faasologa atoa lava, ae na o se brief, na o se auivi e tuuina atu, tusa lea ma le 21 itumalo o lea ua uma ona faalauiloa po ua launch a latou taiala, taiala la lea e aofia ai ma le vaega lea sa saunoa i ai le sui usufono, i le faamoemoe lea mo le atiaeina o lona itumalo ma atonu pe faapea foi ma isi itumalo. E 14 itumalo o lea ua maea ona fai taiala ae le i faalauiloina, ma le isi 14 itumalo o lea o lo o faagasolo i le taimi lena i le galulue faatasi ai o le itumalo ma le Matagaluega e tuufaatasia a latou taiala. A maea la ona faalauiloa taiala nei, ona tuu atu loa lea. Sa fai ai foi la le matou faatalatalanoaga ma le UNDP i se latou fesoasoani e mafai ona tuuina mai e faatino ai la poloketi nei po o taiala nei o lea e naunau i ai itumalo ina ia faatino i totonu o latou lava itumalo ae fesoasoani la i ai le tatou Matagaluega.

O le lua vaiaso talu ai, sa matou feiloai ai foi la ma le Amepasa o Iapani, lea sa faatalanoa ai foi la isi taiala a isi itumalo e tetele tupe e alu ai e le mafai ona faatino e le tatou Malo, a o faatagisia ai le fesoasoani a tatou paaga ia mai fafo.

O le mea lea tau ina ona ou toe faailoa atu, faamolemole le mamalu i a outou Afioga, e le faatonuina lo outou mamalu ma lo outou paia, ae ona o le tulaga o le faamaopoopoga o taiala ia, e taitaifono ai le sui usufono o le itumalo i le Komiti lea faale-itumalo lea e fofoa mai ai atinae ia o lo o manaomia i totonu o le latou itumalo, e mafai ona fesoasoani atu i ai le tatou Matagaluega ma le tatou Malo faatasi ai ma tatou paaga i fafo e mafai ona latou faatinoina.

Ia na o se ootoga lena mo le taimi nei leaga o lea ua taua le pulega a alii ma faipule i le tulaga lea, ae o se taimi mulimuli pe a tali atu le Malo ona avatu lea o le atoaga o lea tulaga. Ma le agaga faaaloalo faafetai i lau Afioga i le Fofoga Fetalai mo le avanoa.

FOFOGA FETALAI: Malo. Ia, po ua maea le faamalamalamaga... Ia, tulai mai le Taitaifono, masalo e tele foi se tapenaga a lau Afioga e fua i le tatou itula faigaluega.

Afioga ALIIMALEMANU ALOFA TUUAU: O lea o le a uma. Faafetai mo le faamalamalaga a lau Afioga i le Minisita, o lea ua maua atu, e tatau la ona toe review DDPs ia a itumalo ia ua leva ona fai i le tolu tausaga talu ai. Faafetai foi i le Failautusi a le Minisita o Aoga mo le faamaumauina o matou

manao. Ae na pau lena o le mea na ona faamanatu atu, o le faleaoga o si o matou itumalo ma le itumalo o Falealupo.

E i ai ma le talosaga e tasi. Lau Afioga i le Minisita o Tupe, e i ai lava le tulaga lea i le tatou Tala Faatatau o Tupe i le aoaoina po o poloketi lea i tina ma tamaitai. E matauina ma le faafetai le tele o vaega tupe ia e aumai mo tina ma tamaitai, ae pe le talafeagai ona faamaoti foi lea i totonu o le vaevaeina nuu i tua po o tina ina ia oo le faasoia i tua, ae aua le, aua e matauina i aoga ia e fai, e tele lava o le au vaega ua aoaoina lelei lea e toe omai lava i aoga ia e faaoga i ai poloketi nei o aoga a tina ma tamaitai. A o se auala e ala atu i le Tala Faatatau o le Tupe e faasoia ai i tina i nuu i tua, e le i oo i ai lea faasoia o a tatou poloketi. Na o se tuualalo.

A o le i faauma atu se tala, e i ai nai fesili laiti ia na afea i le saunoaga a sui usufono i le Lipoti a le Komiti Tupe. O le fesili; pe le i tatau lava ona siitia le aofai o tagata faigaluega mo le Matagaluega o Falepuipui. O le tali, i totonu o le tala Faatatau o le Tupe e i ai avanoa fou e 14, faapea foi ma Komesina Lagolago e toalua o lo o i ai le vaegatupe faatatauina e \$368,000 la e siitia ai le vaegatupe mo tagata faigaluega fou lea aua le Falepuipui i Tanumalala. O le fesili i le vaegatupe lea e faaleleia o le tulaga tau fesootaiga i luga o le initaneti le SNPH po o fea lea e totogi i ai. E i ai le vaegatupe lena e \$246,000, o le tali o lo o totogi i le CSL o latou lena o lo o faafoeina le infrastructure lea mo le tatou Malo.

O le fesili lona tolu, o le vaegatupe lea i le Faletupe o Atinae e \$4 miliona i fuafuaga po o ai e faaoga i ai. O le tali; o fuafuaga o lo o faamatuu atu mo nonogatupe i ni tuutuuga mama tului, aemaise lava mo le aufaifaatoaga. O lo o i ai foi faatalanoaga e le i faamautuina mo le oo atu o le faasoia i nai faletalimalo, ae laitiiti la se vaegatupe e faatapulaa i ai le tulaga lea.

Ma le fesili mulimuli lea sa fesiligia ai i le Lipoti a le Komiti i entry points la e i ai a le Matagaluega o Leoleo pe le tatau ona tutusa. Ia o le Lipoti lava ia o le tulaga lena o lo o i ai ia totogi. Ae sa fesiligia e le Komiti le Komiti lea e iloilo ina totogi o galuega a le Malo ona o nei galuega ona sa tuuina mai ifo i se isi...

FOFOGA FETALAI: Ou te vaelupeina le saunoaga a le sui usufono mamalu ona o le tulaga lava lea o le saunoa ia malamalama se mea. E i ai le manatu ona o lea ua e auiliilia mea taitasi o lea e faapea e lelei ona tuu pea le avanoa i toe laga mai e sui usufono pe a oo i mea taitasi, ae mo le aotelega, ina ia fesoasoani atu foi i lau tapenaga, aua lona uiga e le auau le tatou 5 minute ea pe toe 3 lea e totoe mo le tulaga o lo o i ai. Ae le faapea o le a avea le fautua atu o le Nofoa ma mea o le a limataitaiina ai lou finagalo, a o le galuega tatou te fetufaai ai i le faatinoga ma le lagolago atu o le Nofoa i le galuega.

Afioga ALIIMALEMANU ALOFA TUUAU: Faafetai i lau Afioga i le Fofoga Fetalai. E leai ua maea atu ai i ina fesili sa fesiligia ai le Lipoti a le Komiti o Tupe, faafetai lava mo le fesoasoani mai. E manumanu i le taimi, ona i ai lea o le taofi, o le a foi o le leo o Alataua Sisifo. O le a foi se upu ua le taugamalie pe faapaia fofoga foi, ia tofomalie ma utamalie.

Lau Afioga i le Fofoga Fetalai, ia alofagia e le Atua lou malosi i so o se tulaga manaomia aua tiute o lo o valaauina ai. Maua lau tofa aua le faatautaiga o le Maota o Samoa. Lau Afioga i le Palemia ma le Kapeneta ia maua foi lo outou malosi ma le tofa mai le Atua e fesoasoani i outou tiute e le faigofie. Ia agalelei foi le Atua i le malosi o Minisita Lagolago, e o lo o lagolagosua i Afioga i Minisita. Ia maua foi se malosi i lenei itu o le Maota i Taitaifono ma Sui Taitaifono faapea sui usufono o Komiti Faa-Palemene, ia sili lava le latou tofa ma le soifua faaleagaga e taitoaluaina ai faiva ma tiute o lo o feagai ai.

Ia agalelei foi le Atua i Ofisa Sili o Pulega o Matagaluega ma Faalapotopotoga a le Malo ma auunaga eseese faapea le Failautusi ma le Ofisa o le Fono. Le tapuaiga a Samoa mai e ua i ai le tofiga a le Atua ma lana aufaigaluega tofofi, seia oo i le fuaga lalovaoa. Agalelei le Atua, o a ni mala o fou mai, tau ina ta ma faapoi ae folau i lagima le sa o Samoa.

Ia, si ou itumalo o Alataua Sisifo i le afifio ma papaaa o tupu ma ee o le tatou itumalo, mai Siuosave seia paia Faatoatoa, malo tapuai. O le a se vaivai, tofomalie ma utamalie. Ia, tau ina viia le Atua i so tatou sao ua mafai ona fai aua le atinaeina o le atunuu. Malo le fonousu a Samoa faafetai.

FOFOGA FETALAI: Malo faafetai. Ua manino vaega sa laga e sui usufono mamalu e tusa ai ma le tiute faa-taitaifono ma le Komiti. O nisi mea taitasi sa laga e sui usufono mamalu, o le a faapena ona maua mai le faamalamalama pe a saunoa le Malo.

O le mea la lea, ou te tapa ma le faaaloalo lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI: Lau Afioga i le Fofoga Fetalai ou te tulai atu e momoli le faamalo i sui usufono o le Maota o lea ua matau, ua tofu saunoa uma ia sui usufono mamalu o le tatou Maota nei.

Ia o lea ua sau le afi i le Itu lenei. O le a matou tapena e tali auilili atu ia mataupu uma sa laga. E faafetai foi i le Taitaifono o le Komiti o Tupe o le Palemene. O lea ua tele le faamalamalamaina o le galuega sa feagai ma i latou. O outou lava o sui usufono o le Palemene, e siakiina ia galuega a le Kapeneta.

O lea la ua oo mai i lenei itu, ia ae o le a amata ia le matou galuega i le faatausiuga o le laulau lenei, i le Afioga ia Afamasaga, ia a totoe ai ni nai toega, ia ona ou tali atu lea e faamalamalama nisi foi o mataupu o totoe. Ae

tau lava ina ou faapea atu ma le agaga faaaloalo i le tulaga o le tutulai atu o Minisita ma avatu foi le faamalamalamaga i nisi o mataupu sa lagalaga. O lea e matua maioio lelei ai, e le o tuuitiitia i lalo le faamamafa o lo o ave i le tatou Matagaluega o Faatoaga ma le faataua o faatoaga ma Faigafaiva. O le matua faataua lava o faatoaga ma faigafaiva.

O le upu la lea faapea e toe foi i le eleele, o le matua sese, ma o lea o le a saunoa maeaea i ai ia le Afioga i le Minisita o Faatoaga i le vaiaso a sau. O lea foi la ua uma ona faamaaloiuofe atu e le Minisita, o tatou Pulenuu o Pulenuu Tina ma Pulenuu Tama, po o Sui o Malo i totonu o afioaga. O le a toe polili atili atu ai ia le faataua lea e ave i le faataua a le Malo i faatoaga aemaise le niu ma le toe faamalosia o le totoina o le koko.

O le faafitauli sili lea e faafeagai ma le niu i le taimi lenei, ia ua toe malosi le sau o le manu ainiu. O lea la ua faafogafoga i polokalame ia ua faagasolo nei, i le tulaga o le tapeina o manu ainiu i le tulaga lea o le popo. E i ai le mataupu sa ou faalauiloa i le faatauaina o le tatou atinae lea. E taofi ai le toe ave i fafo o le niu, ae taofi pea i totonu aua o le taimi la ua agai atu lava ina malosi, o le taimi e tuufau ai le totoli o niu, o le mea e oo i ai e le toe vaai tatou i se popo. Ia ma o le tasi lea o mataupu o lea ua tagofia e le Afioga i le Minisita o nafa ma a tatou pulega mamalu a alii ma faipule, i le tau taofiofiga o le soona toli o niu, o mea ia e masani ai ia nuu i aso la. E i ai taimi e taofi ai le toe tolia o niu e taofi le tulaga o le toe saliina o le popo mo masina, se i taofi ai le mea lea o le soona fai o le soona toli ia ma le soona gaofi e isi popo a isi aiga. O mea sa masani ai ia afioaga i tua. O lea foi ua outou faafogafoga, o lea ua malosi le alu, o lea ua faaopoopo pea i ai le malosi o le tatou Malo i le uunaia o le tatou Kamupani lea o le SROS. E fai ai suesuega, pei ona silafia lea ua malosi lava le alu o suesuega ona o le tulaga lenei lau Afioga i le Fofoga Fetalai, e le na o le totoina o laau e taua. O le toto ma le maketiina e taua. O mea ia e lua e taua tele. E le gata la o le toto ma le maketiina, ae e taua foi ia vaa ina ia i ai ni vaa, e mafai ai ona lau mea nei i fafo e pei foi o le taimi o le Yazaki. O mea uma nei e faaipoipo uma mea nei.

O le ala foi lea na laa ai le Malo, ma ina ua bankrupt po o ua gau le tatou Forum Line, Shipping Line, o le a le mea ua fai? O lea la ua faatau mai e tatou, o lea la ua pulea e tatou ,ua i ai ia le tatou Kamupani Vaa. Ua tatou galulue ma isi Kamupani Vaa, tapena uma ia mea, mo le lauina i fafo, o lea faatoa uma nei lava ona ou faasalalauina, ma faasilasilaina ia le tulaga o le faatalanoa foi ma le Kovana o Amerika Samoa e faatatau mo le maketiina o le talo ma isi mea e agai i Pagopago. Ae o lea foi ua alu atoa ia le SROS, mo le gaosiga o oloa, i le tulaga lua ae e le o le tulaga maka lea e i ai nei, ina ia alofia ai ia mo le malosi o mea ia o Tulafono e taofiofi ai ia le ulufale atu o oloa i isi atunuu e pei o Niu Sila ma Ausetalia ona o le tele o manuiti po o manu faalafua ma faamai e e alu atu i totonu i inei.

Manatua o le oo mai o le beetle iinei i Samoa na aumai i totonu mo mea o niu na aumai o laiti aumai ma palapala i nuu i fafo, lea na mafua ai ona sao mai le manu ainiu i Samoa nei. O lea foi la ua toe tupu tele ma ua agai i ai le Malo e taofi o mea uma na, e tau atu ai le faataua o faatoaga e le o taofia. E le faapea o taofia, e pau lava le mea na agai ai i luga faatoaga ma toe aafia, faamai, o afa, ia ma tulaga o faaiuga fai a Malo i aso ua tuanai, na taofi ai ia le toe ave i fafo saoloto o tatou popo ma le koko sa faatau i o i Siamani, faatau foi i Peretania e gaosi ai mea o sukalati.

O Samoa o se tasi o atunuu e toa 14 o le lalolagi, sa alu atu ai ia le high flavoured cocoa, e gaosi ai le sukalati. O mea ia e le o iloa e le toatele ona ua tele tausaga ua tuanai. E oo i le fai, na oo i le miliona a tatou pusafai na ave i Niu Sila, e tau mai lava i le 1962 na tatou tutoatasi ai. O le a le mea lea ua i ai? O lea foi la e le o taofia, o lea e fai lava ia mea o trials, experiments, ina ia toe taumafai e atiae le fai. Manaia tele le tuualalo lea a le Afioga ia Toomata, i le toe liliu o tatou Ofisa Suesue e toe faatele pea ia a tatou lava fai. O lea foi na aumai ia fai palagi. O lea foi na aumai le fai mai o i Isaraelu, o lea e atagia mai ai, o le tasi lena fai e matuai aafia faigofie i le faamai.

Lau Afioga i le Fofoga Fetalai, o le a matua talatala pipi e le Malo, ia fuafuaga mamao uma lava a le Malo, lea e faagasolo, ae e pei e foliga mai e le o i ai se vaai lautele i le soosoo tauau, o atinae uma nei o lo o faatino i le vaai a nisi o sui usufono o le tatou Maota lenei. Ae e aoga tele le lagalagamea mo le faafogafoga mai o Samoa ina ia silafia le mea o lo o agai ai ia fuafuaga mamao a le Malo. E le faapea o ni fuafuaga e ave foi lea, ave i se tulaga isolated, leai o fuafuaga uma lava a le Malo, e soosoo faatasi uma lava mea uma o lo o faatinoina nei. Ae o le vaiaso fou, o le a faafogafoga i ai le tatou Maota nei ma le tatou atunuu i le soosoo tauau ma le galulue faatasi o Matagaluega ma Minisita i le taumafaiga ina ia uunai mea uma nei aoga, tulaga i le soifua maloloina, atinae o faatoaga, atinae o le gataifale, ia ma atinae o afioaga i tua, o le a atili manino ai, i le galuega o le a faatino e tatou po o le a faasilasilaina e Minisita i le vaiaso fou. Manuia tele lo tatou alofaiva i le Aso Sapati, soifua ma ia manuia.

FOFOGA FETALAI: Malo faafetai. Ia ua faafogafoga foi Samoa i le isi faaopoopoga e pei ona faamalamalama atili e le Afioga i le Palemia po o le Taitai o le Malo, mea sa laga mai e nisi o sui usufono mamalu o le Palemene. Ia o le faamoemoega lava, ina ia lelei ma mautu le lumanai o le atunuu. Ae o lea ua faagasolo ia le tali a le Malo. O lea foi ua saunoa le Palemia, e tamua, ae ou te faamalulu atu i lau Afioga a le Matua o Usoalii, po o lau fetalaiiga foi Toeolesulusulu, ona e i ai le manatu, ia o le Paia lava lea aua Satuala, le Afio o Toalepaialii faapea foi le fetalaiiga ia Vaili, Laau na fausia ma Upu i le Faleaana, ia e faapea foi ia le Falefitu, mamalu ia Fasitoo ae a le Taulagi ma le Maopu o le Tuiaana.

O le a e faatoa e saunoa e te tali malamalama maioio i le aso a taeao, ioe, le Aso Gafua. Ioe e lelei ona tapena lelei ia lou sa ia aua le Aso Gafua, leaga o lea ua toe lava o nai sekone, ona maea lea o le tatou galuega. O le mea la lea, leaga o lea ou te matau atu ua e olioli mai o le a, ioe, ia ae e pei e faapena e faamalulu atu le Malo, oi le Fofoga Fetalai.

Afioga Hon AFAMASAGA LEPUIAI RICO TUPAI: Lau Afioga o le a usitaia lou finagalo. O Toeolesulusulu o le tasi lea o le saofaiga o le Aiga Satuala, le Afioga ia Toeolesulusulu, ia o Toalepai o le matua lea o Tofiga o le aiga Satuala. Ia o le toe faalautele lea o lea mataupu lau Afioga, faafetai.

FOFOGA FETALAI: Malo, ia, o le mea sili lava o le mautu ma manino ia faalupega o lo o faapena ona tulai mai ai le sui usufono, ia aua le faaalagamaea o le tatou atunuu.

Ae tatou te le i tolopo, ou te tapa le Afioga i le Gafatasi le sui usufono mo Falealili i Sasae e tulai mai e na te faaiuina le tatou Fonotaga i se tatalo. O ia foi o se tasi o faifeau Mamona.

Na tolopo Galuega a le Fono Aoao Faitulafono i le itula e 12:15 i le aoauli seia aulia le itula e 9:00 i le taeao o le Aso Gafua, 22 Iuni 2020.